

ANTONII BERGAE, 7  
TAVRINEN. DOCTORIS  
Philosophi & Medici insi-  
gnis, Naturales Præ-  
lectiones .



IN MONTE REGALI

*Excudebat Leonardus Torrentinus .*

M. D. LXXV.



BRITISH MUSEUM  
SALE DUPLICATE  
I 7 8 7



# S E R E N I S S I M A E

Margaritæ Valesiæ, Biturigum Principi,  
Inuictissimi Allob. & Taurin.

Ducis, pudicissimæ  
coniugi.



*N*ESCIO quo nam fato in mentem meam uenerit, ut hasce prælectiones ederem, Celsit. q; tuæ nuncuparem: quibus ea in primis explanare studui, quæ ad difficillimam naturalis disciplinæ Præfationem attingere censentur. Cum ne id ego facerem, nominis tui maiestas, & auctoritas monere viderentur, nec non ipsius operis obscuritas postulare, quæ in hanc usq; diem Aris. interpretes plurimum turbauit. Tantum autem apud me potuit studiosorum utilitas, ut illi potius, quàm officio meo aut tenui famæ consulendum, existimauerim. Itaq; Celsit. tuæ cum ea sit gloria, ut in genere regio non solum heroicis moribus abundare, sed etiam rerum omnium cognitione summis principibus præstare, omnes intelligāt, opus hoc meum tibi dicari hodie sustinebis: quod & si quantum mea intersit, obscurum fore videatur, plurimum tamen diuinitatis secum habet, cum ob prima sapientiæ initia, quæ nobis aperit, tum propter sui Auctoris præstantiam, in quo Natura quicquid in humanis fieri potuit, collocasse putatur. Futurum enim est, ut absolutum de principiis rerum naturalium sermonem emittam, quod paratum habeo, quando inque hæc lau-



4  
dari cognouero, atque sub auctoritate altissimi tui nominis  
prodire patiar; quandoquidem Celsit. tua illis solum rebus di-  
gna sit, quæ in honestis & præclaris principem locum obti-  
nuerunt. Etenim cum Religione Fide nec non Pietate ani-  
mum ad corporis illecebras cœlitus demissum fuisse, minime  
ostendas, sed ut diuinis Mentibus nobis uiuendum fore ar-  
bitremur, quæcumque Sapientiam ipsam æmulantur iure i-  
pso tibi debentur. Atque cum eam vitam agas, quam intel-  
ligentie viuere perhibentur, non paruum delectationem phi-  
losophica monimenta assiduis tuis meditationibus suppedita-  
bunt. Propterea quod nihil pulchrius ijs qui mortem sæpe me-  
ditantur, contingere ualeat, quàm ea maxime contempla-  
ri, in quibus felicitatis originem collocatam esse uidemus;  
qua quidem Celsit. tuam cum delectari fruiq. quotidie ex-  
periamur, quoniam nullis uirtutibus caret, ut mihi non nihil  
tanti boni accedat, studia mea fouere indiesq. augere mini-  
me recusabis. Cuius profectò rei me uoti compotem futurum,  
cum sperem, finem dicendi faciam. Atque interea Deos  
exorabo, ut multis sæculis Celsit. tuam, Ducemq. potentis-  
simum nobis imperare, patiantur. Vale ex Florenti A-  
cademia Montis Regalis decimo octauo Calendas Nouembres:

Celsit. Tuæ

Humilis seruus fidelisq. subditus  
Antonius Berga.





VI de summo vitæ huius Bono recte sancte-  
 que dicere consueuerunt, cognitionem illam  
 ualde præstare intellexerunt, cuius institutio  
 in sola diuinarum humanarumq. rerum me-  
 ditatione se ipsam continere videtur: quan-  
 doquidem nihil ea cōtemplatione melius ho-  
 minibus euenire posse putent, quæ cum ratione incedens, en-  
 tium omnium naturam indiuisibilem assequitur & specula-  
 tur: propter quam immobilium separatarumq. substātiarum  
 notitiam consequimur, in quibus fœlicitatem omnem reposi-  
 tam esse fatemur. Siquidem primæ cum existant, nihil admit-  
 tere uideantur, quod diuinissimam illarum actionem impe-  
 dire valeat. Quæ profectò maiestas in primo rerum omnium  
 appetibili supremoq. intelligibili admirabilis esse fertur, cum  
 aliud nusquam reperiri valeat, in quod hominis animus ali-  
 quando ferri debeat. Inferiores autem mentes eius gratia mo-  
 uere, semperq. intelligere student, ut illi quantum fieri po-  
 test, similes euadant, necnon præclarum illud vitæ genus ex-  
 periantur, in quo potestatem nullam inesse apparet: quam u-  
 bi mens nostra in magnitudine posita, secum habet, difficile  
 est ut mortem ipsam meditetur, quod propriam eius opera-  
 tionem in vita perfecta esse, putamus, quoniam operatio, quæ  
 secundum virtutem fit, omnium proculdubio est iucundissi-  
 ma, ut quæ mirabiles secum habeat puritate nobilitateq. vo-  
 luptates. Etenim cum tota in intellectu posita sit, assiduam  
 nullisq. temporis mensuris definitam contemplationem ha-  
 bet, entiumq. omnium Ideis plena, summa fruitur fœlicita-  
 te. Illos itaque quos rerum omnium cognitione abundare vi-  
 demus, uere beatos esse nemini dubium extare debet, propte-  
 rea quòd in ceteris, quæ animi non sunt, nullum bonum in-  
 ueniatur: vnde apud Athenienses, quemadmodum Plato in  
 Timæo testatur, sancitum erat, ut qui Sapientia præstarent, di-  
 uitias



uitias contemnerent, præsertim Reipub. custodes, quoniam virtutem omnia suppetere, Thaletis Milesii factum ostendit, qui ab astronomia edoctus, futuram olei penuriam, cum plurimum modico argento suum faceret, amplas diuitias facile comparauit.

Pluris autem illæ sunt faciendæ, quæ hominis animum instituunt atque exornant, quas cum iustitia, fortitudine, prudentia, animi magnitudine, nec non rerum omnium scientia, accedere videmus: quorum usus in vero perfectoque homine desideratur, siquidem illis cum virtutibus veterem hominem exuat, nouum autem induat, Fortitudine autem cum ab iis, quæ in sensu posita sunt, se ipsum separet, quæ difficillima videntur, audere minime dubitat, inter quæ principatum iustitia obtinuit, cuius præstantiam adeò extollere visus est omnis Sapientiæ princeps, vt dixerit, neque Hesperus, neque Lucifer, adeo fulgens est, & mirabilis, cum uirtutes omnes iustitiam ipsam concomitentur. Nullam enim sui commodi rationem habet, at semper alterius curam suscipit, Quapropter illos tantum iustos appellare decet, apud quos huius uirtutis perfectus est usus, quoniam suis in rebus unumquemque utiliter se habere, facillimum extat, in iis autem, quæ ad alios spectant, difficillimum, quod sapientissimus Bias uere dixit: Magistratum virum ostendere, siquidem in eo iustum atque iniustum reddi possit, at illorum alterum altero operosius, quoniam recta facere nemo valet, nisi sedatis animi motibus quibus homines vt plurimum in deterius cõmutantur, ex quo mirum esse non debet, si probabiles nec non captiose in Foro insurrexerint disceptationes, quæ omnem iustitiæ usum euerterunt, in quo admirabilis vniuersi ordo, rerumque omnium immutabilis constantia continetur. Natura tam sapiente omnia gubernare, & singula fouere non posset, nisi recta ratione vteretur, cuius imperium quæcumque suscipiunt, aptissima lege sustinentur, quod Mundus Deorum & Hominum declarat, quorum superior inferiorem ita moderatur, ut fer-



per eius lationibus sit continuus atque omnis sua virtus inde gubernetur, quod quidem legem a Satore & totius Orbis Opifice inditam fuisse declarat, nullumq. animantium esse, nostra hac in regione comprehensum, cui fatum naturæ ingentum non fuerit, male siquidem homini consultum esset, si fato quodam destitueretur, cum modo sensum, modo rationem ipsam insequatur: Dij autem in indiuisibili semper maneant, menti q. tantum inseruiant, Bruta uero ad id solum ducantur, quod uis eorum ingenta requirit.

Absque prudentia nihil rectum homo facere potest, cum illa habitus quidam sit animi quo quid nam in vitæ actionibus insequendum sit, quid ue fugiendum facile dignoscitur. Nulla etenim electione, nullo item consilio humanum genus uteretur, nec minus de societate ipsa sine prudētia quicquā cogitasset atque secundum ceteros mores recte se habuisset; Quare Socrates in Memnone Platonis principem locum prudentiæ uisus est tribuisse, quoniā uirtutes cū bona in actione positæ sint omnis autem actio, quæ bona est, recta cum ratione accedat, recta autem ratio ipsa cum prudentia contingat, non sine illa ceteras uirtutes constare patet.

Magna autem facere, proprium hominis esse, cum uideatur, quoniam ceteris imperat animantibus, absque animi magnitudine præclare viuere non potest, elato enim animo esse, non autem humili & abiecto, solius hominis proprium fore censetur, ut quem minimis incumbere non deceat, sed magnis quæ immortalia existunt.

Mobilium præterea necnon immobilium & separatarum substantiarum cognitio summa illius est perfectio, siquidem propter contemplationem Natura hominem fabrefecerit, multisq. organis & potentijs exornauerit, quibus rerum omnium species necnon ipsarum intelligentiam fusciperet, quod illi præstare cum esset difficile, coepit ex eorum, quæ apparebant, admiratione, causas earum inuestigare, donec primam intelligeret, in qua quæcumque cum sensibilia tum intelli-



telligibilia actu existunt, veluti in materia prima potestate, quorum notitia nihil habet præstantius, cum tantarum rerum scientia, brutis imperet, Deoq. similis euadat. Nam quando-cumque huiusmodi actione destituitur, nihil sanè à pecu-dum genere discrepare uidetur, viuere enim & ipsum senti-re atque aliquid cogitare, cernimus: præstantissima itaque hac operatione ab eo sublata, nihil supra hæc agit, quoniam potestates illæ, quæ nihil mentis habent, omnes à materia or-tum ducunt, nec non ab ipso corpore dependent, itaque im-perfectæ sunt, ut nullam homini diuinitatem concedere va-leant.

Rerum itaque perfecta cognitio illi proposita fuit, ut omnium inferiorum operum præstantissimum esset, quod mi-rabiles Naturæ effectus per ueras propriasq. causas meditare-tur, donec ultimam perfectionem indueret, quam indocti homines assequi non possunt, quemadmodum Orpheus iisce carminibus testatur.

Gens indocta feris similis, cui celica nullam

Mens lucem irradiat, sed quæ improba despicit omne

Consilium Diuum, lucens mortalibus, & quæ

Haud meditatur opus celsum, & mirabile, quam non

Atra finit nubes, cingens fera corda, subire

Florida prata Deæ virtutis, & amœna vireta.

Mens enim extrinsecus nobis cum accedat, nec in semine cum aliis potentiis sedem habeat, lumen aliquod nobis con-cedere nō potest, vbi primæ generationis naturam retinemus, quæ tota in materia & quattuor elementis posita est: quare al-teram Natura nobis miserta, cōcessit, quæ in sola intellectuone manet: Habitibus enim speculatiuis rudis animus cum perfici-tur, insurgit, nec non altissima meditatur, ad quæ sensus ipsi ferri non possunt, proinde tantam induit nobilitatem, vt summi luminis compos euadat, cuius beneficio separata intel-ligit, nec non intelligentiæ naturam induit, nullam phantaf-matum rationem habens, sed earum tantum rerum, quæ mē-



tem ipsam exornare videntur, inter quas materies sine qua nulla rerum naturalium constare potest, primum occurrit, etenim à motu separare cum nequeant, omnis autem motus subiectum requirat, materiam adesse oportet, necnon & formam, propter quam actionem & passionem in omni generatione, id quod subiectum est, admittere videtur.

Quibus motus cognitio succedit, quandoquidem absque motu, nihil naturale dici mereantur, quoniam quaecunque mota mouent, naturalis sunt considerationis, quæ vero non, alterius disciplinæ. Tres enim cum sint scientiæ speculatiuæ Naturalis, Diuina, & Mathematica, non solum penes materiam circa quam versantur, differre videntur, verumetiam secundum ipsam definiendi rationem: Naturalis autem circa ea quæ sunt cum materia & motu uersatur, quare sine illis nihil considerare, debet, limitatem enim quæ est quædam naturalis forma, sine naso minime definit: Diuinus autem philosophus omnia à, materia & motu separat, nullamq. eorum in substantiarum tractatione, rationem habet. Mathematicus circa magnitudines ratione tantum à, materia separabiles, uersatur, quare omne mobile naturale est, & omne naturale mobile, ea est in natura uis ipsius motus: cuius cognitio confert plurimum, ad ea perquirenda, quæ à sensibus valde seiuncta sunt, veluti sunt prima & simplicissima rerum naturalium principia, nec non & primam mouens, quod esse, motus ipse ostendit: veluti materiam primam, continua horum inferiorum generatio & corruptio, quoniam cum alterum contrarium manere, alterum uero abire opus sit, ne id quod producit, simplex fiat, materiam cum altero oppositorum reperiri, necessarium extat.

Motus autem cognitionem, loci & temporis tractatio sequitur, postea uero vacui atque infiniti, quorum aliquam rationem naturalem philosophum habere decet. Alicuius enim momenti apud priores philosophos fuit locus, cum primorum corporum differentiam ab ea, quæ locorum est, acciperent,



quos ea in re quodammodo Arist. sequutus est, cum graue corpus illud esse, dixerit, quod ad medium fertur, leue autem quod à medio, plurimi quinetiam qualitates secundas à loco desumpserunt, cum molle illud esse, dixerint, quod alieno termino, durum quod proprio facile describitur. Atque naturalia corpora cum in loco moueantur & quiescant, sitq. locus terminus corporis continentis, ad motum necessario loci perscrutatio sequitur: omne autem corpus, quod fertur cum non in instanti, sed in tempore cieri debeat, temporis notitia succedit, cuius ea traditur ratio, esse mensuram motus secundum prius & posterius siquidem tempus sit aliquid ipsius motus, quoniam temporis differentiae sunt in motu.

In mouentibus vero & motis, cum sit necessarium dari statum, quoniam infinitum natura minime patitur, ad vnum primum monens, quod ab alio nō moueatur, deuenire oportebit, quod quidem penitus immobile existat: Atque semper cum fuerit motus, ad illud primum mouens ascendere, quod immateriale est & sempiternum, propterea q̄ perpetuitas motus virtutem infinitam sequatur, quæ ad præteritum & ad futurum æqualiter se habet, non autem finitam, quæ magnitudinem necnon ipsum corpus admittit.

In ijs itaque quæcumque ad rerum naturalium principia pertinere possunt, constituta sunt, à quibus omnis, quæ cum ratione contemplatio procedit, initium facere debet, cum ab eis cetera non solum ipsam essentiam, verumetiam & intelligentiam adipiscantur: inter quæ cœlum cum elementis omnium corporum simplicissima, primum occurrunt, quorum cognitio hominis animum ualde extollit, siquidem cœlo prima causa utatur, ut eorum, quæ sub Luna sunt conseruationem intendat, elementis autem ut inferiora omnia esse ipso mortali fruerentur, in quo mixtorum omnium ortum nec nō ipsum interitum experimur, variasq. naturæ operationes admiramur, secundum quas illam nostris in actionibus imitatur: quorū nō est ut modo separatos sermones habeamus.

Quibus



Quibus si ea, quæ ad animatorum materiam & formam spectant, nec non ad animalium & viuentium operationes addiderimus, nihil omissum uidebitur, quod ad naturalem contemplationem conuenire videatur, quoniam in animatis & illorum operibus finem suum natura collocasse, putatur.

## DISPVATIO DE BEATITVDINE.

**H**ominem in mortalibus, ad foelicitatem natum esse, satis ex his, quæ præfati sumus, patere potest. Itaque operæpretium est, ut de beatitudine ipsa peripatetice disputemus, quantum locus hic postulare videtur, quandoquidem huius problematis occasionem dederit Arist. At cum foelicitas ipsa nihil aliud sit, quàm fruitio aut ipsa summi boni adeptio, quæ in separatarum substantiarum contemplatione constituta est, non sine ratione quærimus. An intellectus noster in magnitudine existens, separata intelligat, ita quòd homo per intellectum, intelligentiarum cognitionem assequi valeat, & tandem beari. Ad vtramque problematis partem Arist. scripta reliquit, cum in Metaphy. uideatur modo affirmare, fieri non posse, ut intellectus humanus Deum & Angelos intelligat, quoniam intellectus noster ad separatorum cognitionem se habeat, quemadmodum oculus Noctuæ ad lumen Solis, aliquando autem illa intelligere statuatur: quoniam separata nisi intelligerentur frustra essent, cum omne quod sui natura est intelligibile, quemadmodum actu intelligibilia sunt necessarium sit ut intelligatur. Quod etiam optimis rationibus in vtramque partem allatis, dubium esse & Theologi & Peripatetici ostendunt. Etenim Theologi cum beatitudinem constituent in intuitionem Dei benedicti, in hac vita hoc illi minime contingere volunt, cum quibus munus nostrum ut disputemus nequaquam postulat. Satis itaque officio nostro satisfactum iri putamus, si rationes quibus Arist. interpretes utuntur, attulerimus, nec non quas habeant in hac perdifficili ma-



teria opiniones.

Hominem autem separata minime intelligere, eo argumento ostendi potest: quoniam intelligere ex Arist. sententia in primo de anima cum sit phantasia quædam, aut non sine phantasia, Dei autem & Angelorum, quæ actu separata sunt, non autem separabilia, nulla sit phantasia, fieri non potest ut ea intellectu, quæ per speciem accedit, intelligentur. Ea vero intellectu, quæ est per essentiam, cum tantum contingat intellectui, cum non amplius a phantasia dependet, in hac vita separata intelligere humanus intellectus non potest.

Quod vero separata humanus intellectus intelligat, rationabile videtur, Quoniam Homo in hac vita nisi ultimam perfectionem indueret, atque intellectum illius aliquando a phantasia minime dependere contingeret, in eoq. eadem esse intelligens intellectum cum intellectu, sequeretur ipsum omnium animantium villissimum fore, cum proprio fine destitueretur, nec non agentem intellectum, frustra illi tributum esse.

Nulla est inter Aris. interpretes dissensio, quod humanus intellectus separata intelligat, at quo nam intellectu, hoc illi contingat, digladiantur, cum plures in anima rationali reperiuntur.

Alexander etsi in hoc ualde ambigere uideatur, quod intellectu materiali, quem præparationem & mortalem esse voluit, homo separata intelligere non ualeat, existimauit, quoniam mortale æterno uniri, est impossibile, atque sit necessarium, inter virtutem & obiectum proportionem cadere: quod si virtus materialis fuerit, ad immateriale penitus ferri non potest, quoniam sequeretur, uirtutem siue substantiam possibilem in necessariam conuerti, atque intellectum ipsum materiale, qui mortalis est, fieri unum cum Deo, quoniam intelligentem oportet idem fieri, cum eo quod intelligit, si per essentiam & actu intelligere debeat, virtus enim immortalis cum per speciem intelligit, mortale intelligere potest, at cum per essentiam virtus mortalis intelligit, immortale cognoscere



scere nequit, quoniam in intellectu per essentiam, cū intellectus sit ipsa intelligibilia, sequeretur, naturam corruptibilem in perpetuum mutari, quod valde est absurdum apud Peripateticos. quare opinatus est Alexander, q̃ per intellectū adeptum homo separata intelligat, qui quidem intellectus, nihil aliud sit, quā intellectus ille, qui actu intelligit & est factus ipsa intelligibilia, quem Them. de mente Alex. uoluit componi ex intellectu in habitu & intellectu agente. Hunc autem intellectum separata intelligere uoluit, qm̃ nobis extrinsecus accedere videtur, siquidem ut noster intellectus actu intelligat, sit necessarium, quæ sunt potestate intelligibilia, actu intelligibilia reddi, ab intellectu agente, qui secundum Alexādrum cum sit ipse Deus, quando actu intelligimus, contingit Deum intellectui nostro copulari modo formæ, cuius auxilio potest intelligere separata. Ita ut homo per Deum separata intelligat qui est separatus. Proprium enim intellectus adepti cum sit creare ipsa intelligibilia, nec nō illa intelligere, est necessariū ut quæ sunt potentia intelligibilia, actu reddat talia & ut omnia entia tum materialia tum immaterialia intelligat. Cum itaque hic intellectus sit ipsamet intelligibilia & omnia, fieri nō potest qui inseparata intelligat. Atque cum sit necessarium inquit Alexander. Omne ens, quod generatur ut in fine generationis suam actionem consequatur est necessarium intellectū in habitu cum peruenerit ad finem suæ generationis ut suam exerceat operationem, quæ est creare intellecta & illa intelligere, quod intellectui in habitu contingit cum transit in adeptū ex copulatione agentis.

Alpharabius cum Alexandro concordat, intellectum materiale esse generabilem & corruptibilem, discordat autem ab eo, quoniam hunc intellectum etsi mortalem, separata intelligere putauit, propterea q̃ Agens intellectus apud eū nihil aliud est, q̃ causa efficiens in nobis, ita quòd in sui perfectione agentem, qui immortalis est intelligat, quoniā fieri non potest quin ea, quæ sui natura sunt intelligibilia, non intelligentur, quem-



quemadmodum sensibilia sentiri videmus separata intellectu mortalem perfectum tamen, intelligere putauit, quod magis eo argumento ostendit, quoniam hic intellectus aptus est abstrahere formas ipsorum intelligibilium, & per consequens abstracta intelligere, cum difficilior sit abstractio ipsa intellectione.

Auempaces autem Hispanus, qui huius intellectus immortalitatem cum Themistio profitetur, existimauit, hoc intellectu æterno adhuc imperfecto, hominem intelligere separata, quoniam hic intellectus est aptus, etiam abstrahere formas ipsorum intelligibilium, atque quidditates, cum itaq; in quidditatibus, quæ ab intellectu separantur, detur status, erit necessarium deuenire ad primam quidditatem, quæ abstractorū est, quam intellectum intelligere oportet.

Themistius vero intellectu materiali & perfecto, hominem substantias separatas intelligere, putauit, in III. de anima cap. quinquagesimo primo, ubi ait, videtur enim intellectus materialis etiam hac facultate præditus, proculdubio, ut res poenitus materia abiunctas possit comprehendere. Nam qui naturas materiales separando, intelligit, longe facilius ea intelligat, necesse est, quæ per se abstracta sunt. Non.n. inferior est materialis intellectus agente, quod in materialia non intelligat, sed quia materialis quandoq; Agens autem semper illa intelligit atque cum abstrahat multo magis separata intelligere debet.

Et quando intellectus hic fuerit perfectus, operationē propriam exercebit, & Deo assimilabitur, in eo quod uidebitur quodammodo entia omnia esse, quod non patitur ubi adhuc est imperfectus.

Simplicius autem quem Auerroes sequi videtur, eo intellectu hominem separata intelligere dixit, qui semper intelligit, nec à phantasia dependet, quem Mentem quandam esse voluit, in se manentem immortalem atque omnino separatam, quoniam beatitudo cum in ea intellectione, quæ per essentiam



sentiam accedit, posita sit, intellectui qui à phantasia dependet, & per species, quæ ab eo separantur, intelligit, contingere non potest, sed illi solum, qui quidem est omnia intelligibilia, tum materialia tum immaterialia atque semper intelligens, quod quidem homini tantum in postremo vitæ euenire, videtur, momentoq. temporis illi adesse quando intellectus agens nobis efficitur forma in actu, in ea copulatione, quæ actu efficitur. in qua in intellectu nostro idem sit intellectus, intelligere, atque id ipsum quod intelligitur, ueluti in Deo & ceteris intelligentijs.

Quod clarius in tract. de beatitudine cap. iiij. declarat, cū inquit, virtus rationalis, quæ est in homine non est ipsa eadem in se intellectus in actu, nec per naturam suæ essentiæ, sed intellectus agens reducit eam in intellectum in actu, & concedit quòd alia sint sibi intelligibilia in actu, quod quidem cum animæ rationali contigerit, tunc ascendet ad assimilationem rerum abstractarum, & intelligit suum esse, quod est actu intellectus, & tunc in eo unum & idem efficitur intelligibile intelligens atque intellectum, nec non reducitur in essentiam intellectus agentis, ita vt intelligat agentem, qui fuit in causa ut actu fieret intellectus, quādo illi est copulatus: cum itaque intellectus noster hanc perfectionem acquisiuit, completa est nostra beatitudo inquit Auerroes.

Sententiis diuersis in hac materia propositis, necessarium est vt quæ nam illarum ad Arist. mentem magis accedat, discutiamus. Itaque ut ab illis exordiamur, qui intellectum materiale mortalem profitentur, hanc nobis relinquunt difficultatem, quoniam nullam viam naturalē habent, quomodo possimus quemadmodum inquit Auer. continuari cum intellectibus abstractis, intellectus enim debet esse intellectū omnibus modis, præsertim in rebus a materia separatis, quare si substantia generabilis & corruptibilis posset intelligere substantias abstractas, efficeretur unum cum ipsis, ex quo tandem sequeretur, naturam possibilem reddi necessariam, quod est impossibile, cum



cum æterno & corruptibili nihil commune esse valeat.

Alexandri autem dictum, quod intellectus adeptus separatas substantias intelligat, dubitationes habet, quoniam hic intellectus cum nihil aliud sit, quam intellectus, qui actu intelligit, & est ipsa intelligibilia, alterius substantiæ esse non debet, ab intellectu in habitu, ex quo fieri videtur, cum intellectum agentem recipit, atque intellectus in habitu & qui actu est, cum sint mortales secundum Alexandrum, qui tantum agentem, qui non est pars animæ nostræ, sed Deus, immortalem asserit, non poterit abstracta intelligere. atque cum sit necessarium si agens immortalis illi copulatur, ut separata intelligat, profectò ipsum agentem intelliget, quod si dabitur, erit adhuc dicendum, mortalem naturam in immortalem conuerti.

Quoniam opus est, ut id quod per essentiam intelligere dicitur, sit idem cum eo quod ab ipso intelligitur, intelligere enim per essentiam, nihil aliud est, quam fieri actu ipsum intelligibile, quod si actu fiat intellectus noster intellectus agens, qui Deus est, quomodo nam fieri poterit, quin natura mortalis non transeat ad immortalē: nec potest copulatio hæc agentis reddere immortalem intellectum in habitu, quoniam secundum Alexandrum, intellectus agens cum de foris accedat, sitque ipse Deus, non potest nobis uniri nisi ut forma assistens, & concurrere quemadmodum Sol ad ea, quæ illuminantur, quare & si videatur esse causa, quod intellectus in habitu actu intelligat, non potest tamen esse causa, ut quod est mortale, euadat immortale. Difficile præterea est, admittere, quomodo nam Deum æternum contingat animæ nostræ mortali uniri, quare relinquatur, hæc Alexandri sententia, quæ plurimis confutat Auer. in 3. de anima. com. 36.

Priores etiam Alpharabii opinio dubitationes admittit, atque falso nititur fundamento, quoniam etsi intellectus agens tantum uideatur esse causa efficiens, attamen intellectus, qui possibilis est, non est ille qui intelligit, sed qui actu est ipsa intelligibilia, & idem cum illis, quare intellectus materialis ille

non



non est, qui agentē intelligit, sed intellectus in actu, qui quidem nihil aliud est, quā intellectus speculatiuus actu ut ita dixerim speculans, quare intelligibilia etsi fieri non possit, quin intelligantur, non tamen à materiali intellectu intelligi debent, sed ab eo qui actu intelligit, quemadmodum visibile fieri non potest, quin ab eo qui actu uidet, non uideatur. Alterum præterea Alpharabij fundamentum nihil concludit, quoniam etsi munus illius sit, abstrahere, species ipsas, non tamen est necessarium vt per essentiam intelligat separata, bene potest per species ipsas intelligere, quod ad beatitudinem nihil facit. Nobis enim hoc loco sermo est de illa intellectiōe, quæ est per essentiam, quam sub est actu separate, quorum nō est phantasia, requirunt.

Præterea quemadmodum Auer. ad Alph. scribit, si intellectus materialis generabilis & corruptibilis separata intelligit, cur ergo huiusmodi intellectiō non se habet, quemadmodum aliæ intellectiōes materiales.

Auempaces sententia, quæ asserit intellectum materiale æternum nondum perfectum, separata intelligere, in primis destruit Arist. in 3. de anima, qui hunc intellectum tabellæ assimilât, in qua nihil depictum est, quare cum nullum sit intelligibile, sed potentia ea, quæ intelligi debent, fieri non potest, vt aliquod intelligibile intelligat, cum sit necessarium intellectum, qui tum materialia tum immaterialia intelligere debet, ipsa intelligibilia fieri, quod quidem intellectus imperfectus admittere non potest, sed ille solum, qui actu est atque actu intelligit. Atque cum necessarium sit, ad intellectiōem, vt id quod est potestate intelligibile, actu tale reddatur, quoniam in intellectus operatione, quemadmodum in illa, quæ sensuum esse fertur, tria concurrant, non poterit absque agente intellectus materialis in aliquod intelligibile intelligere. Mirum præterea est cum hic intellectus imperfectus omnibus datus sit, quare non omnes separatarum substantiarum cognitionem assequantur, si nulla ad illarum contemplationem di-



positio per habitus speculatiuos desideratur.

Fundamentum autem quo utitur Auemp. nihil concludit, quoniam etsi abstrahat, quoniam abstractè recipit hic intellectus, propterea non est dicendum, per essentiam separata intelligere, etsi in separatione quidditatum perueniat ad primam quidditatem, cuius non est quidditas, quæ abstrahi debeat, qm̄ in abstractione illa fieri nō potest prima quidditas, cū actu nondum intelligat. Præterea quemadmodum inquit ad Auēp. Auerroes, si intellectus in separatione quidditatum successiue intelligit, sequetur, in substantia æterna dari actionem nouam, quod est impossibile, quoniam æterna virtus tam in præterito quàm in futuro intelligere debet.

Quod etiam sententia Them. admittere videtur, cum ponat intellectum hunc æternum non nisi perfectum intelligere separata. Quoniam si est æterna virtus hæc, cum illi possit intellectus agens statim continuari, mirum est, quomodo nam in præterito veluti in futuro non intelligat ipsa separata, quoniam perfectio, quam habet, sufficit ad Agentis intellectus copulationem. Them. vero fundamentum ex eo iam sublatum est, quoniam virtus materialis, quæ abstrahit, potest quidem per species intelligere, non autem per essentiam, nos autē hanc quærimus, in qua est posita hominis vltima perfectio & beatitudo: & propterea inferior est intellectus materialis agente, cū per essentiam Agens intelligat & semper materialis autem per species, & quādoq; intelligat quādoque autem non intelligat. Quare materialis intellectus cum sit æternus, etsi materialia & immaterialia per species intelligat, non est dicendum illū actu separata, quorum non sunt species, per essentiam intelligere.

Vera itaque nec non Peripatetica erit opinio Simplicij & Auer. intellectum materiale Agenti copulatum, qui quidē est mens nec amplius à phantasia dependet, cum in eo sit idem intellectus, intellectio, & intellectum atque semper intelligat, nec non per essentiam, separata intelligere, ex qua tandem oritur beatitudo, quoniam intellectiōem in qua foelicitas posi-



ta est, assiduam esse oportet, quæ intellectus qui adhuc à phantasia dependet, esse non potest: unde mirum non est, si tantum in ultimo vitæ nobis contingat, cum rerum omnium Ideis & cognitione abundamus, atque ab ijs corporeis & materialibus mentem ipsam separamus, in quo quidem Deorum actionem exercere videmur. Etenim cum ipsum intelligere, sit propria intellectus operatio, atque aut per specierum separationem fiat, aut per essentiam, veluti quando Deum cognoscimus, ut est ipse Deus, in ea intellectione Beatitudo consistit, quæ est per essentiam, ea uero quæ fit abstractione specierum, disponitur solum intellectus noster solum ad ipsam intellectionem, quæ universalium est.

Quæ quidem copiose magis & subtiliter in 3. de Anima, si dabitur occasio, repetemus.

Auctoritas autem Arist. quæ à nobis in contrarium allata fuit, difficultatem quidem arguit, esse autem hoc impossibile, nequaquam. Quare etiam nec ratio ipsa cogit, quoniam non semper contingit, intelligere esse cum phantasia, quoniam cum per essentiam intelligit, absque imaginatione intelligere videtur intellectus noster.

## DIGRESSIO DE SVBIECTO NATVRALE DISCIPLINAE.

**P**Lurima cum sint, ea quæ ad Naturalem disciplinam spectant, ut ab illa scientia, quæ una est, tractari commodè valeant, operæpretium est, unum illis commune genus statuere, à quo contineantur: de quo in hanc usque diem, Aristotelis interpretes habent controuersiam.

Etenim qui Platonem sequuntur, Naturam genus subiectum & rebus omnibus naturalibus accommodatum esse dixerunt, cuius principia, partes atque passionem in physicis explicentur: quod etiam Arist. testimonio confirmantur cum in 3. Physic. Auscul. dicitur Methodum esse, de natura



naturales, quatenus corporeas, genus subiectum fore statuit: quoniam de incorporeis est Diuina, de corporeis autem immobilibus tamen sunt Mathematicę. Quidam Latinorum corpus mobile pro subiecto posuerunt, cum triplex dari corpus excogitauerint, naturale, Mathematicum & Metaphysicum; quod, an ita se habeat, ad libros de cœlo discutere pertinet.

Thomas quem plurimi sequuntur, ens mobile subiectum genus & materiam toti philosophiæ naturali accommodatam esse uoluit, non autem corpus, quoniam corpus de materia; forma, primo mouente & anima rationali minime dicitur, atque cum de ente simpliciter sit Metaphysica, de ente mobili necessarium est, Naturalem philosophiam sermonem facere, Mathematicas autem de ente quanto.

Scotus Theologus insignis, substantiam finitam materiam siue subiectum genus esse uoluit, propterea, quod finitum atque infinitum sint passionis primi modi, ipsius substantiæ.

Auerroës autem in præfatione lib. Physicorum, Res sensibiles, in quantum transmutabiles, nec non illarum accidentia, quoniam de sensibilibus rebus atque immutabilibus etiã considerationem facere potest Diuinus philosophus, qui utramque substantiam speculatur, sensibilem scilicet, nec non intelligibilem. de accidentibus autem immutabilibus Mathematicę dicere possunt.

Alexander autem, Themistius cum Theophrasto videntur substantiam sensibilem, quæ quidem à motu minime separat, aut substantiam ipsam mobilem, quos sequitur Auicē. genus subiectum totius philosophiæ naturalis affirmare propterea quod Aristoteles in principio sexti Metaphy. ubi scientiarum speculatiuarum differentiam ex genere nec non à definiendi ratione sumi determinat, tandem propter partes entis præter Metaphysicam, quæ ens contemplatur Naturalem & Mathematicas disciplinas inter scientias speculatiuas collocauit, quarum altera substantiam altera aut accidens, in quæ ens diuiditur, speculantur: atque substantia ipsa cum



in sensibilem & mobilem, intelligibilem atque immobilem se-  
 cetur, quæ sensibilis est à motu tamē nō separat Naturali subij-  
 citur considerationi. Quod clarius ab Arist. in. 12. Meta p hy. 5.  
 scriptum est, cum inquit, tres igitur cum sint substantiæ, inter  
 quas una immutabilis pœnitus & immobilis est, quæ non sen-  
 su sed intellectu solo cōprehenditur, reliquæ duæ sensui subie-  
 ctæ sunt, quarum una perennis altera caduca, inquit, sen sibi-  
 lis substantia naturali scientia indiget, non enim à motu eua-  
 dere potest, secundum omnes sui partes: altera vero ad aliam  
 scientiam spectat, cum nihil utrique sit commune.

Atque nam earum opinionum, quas recentere libuit, ma-  
 gis ad mentem Arist. accommodata sit, operæpretium est, vt  
 discutiamus. Vt autem à priori exordiamur, non adeo pa-  
 tet, natura, ut apte de omnibus in physologia consideratis,  
 dici possit, siquidem uere tantum Natura de materia & for-  
 ma dicatur, alia autem potius à natura sunt, aut secundum  
 naturam. atque inscriptionem nobis tantum suppeditat to-  
 tius naturalis disciplinæ, non autem cetera, quæ subiectum  
 præstare solet, quare Platoni relinquatur qui Timæũ de natura  
 inscripsit: cum apud Peripateticos, qui de subiecto si est, &  
 quid est supponunt, nullum locum mereatur, atque pars po-  
 tius subiectiua sit, cuius definitionem veluti ceterarum par-  
 tium tradit Arist. non autem subiectum. Totius scientiæ,  
 cuius si est & quid est à superiori artifice peti solet. Nullum  
 autem eorum fundamentum nobis negotium facere potest,  
 quoniam de Natura cogitur Arist. in 2. Physicorum dicere  
 propter motum cuius natura principium esse fertur, atque  
 cum omnibus naturalibus insit, in ijs, quæ communia viden-  
 tur, poni debet.

Simplicij sententiæ etsi magni doctoris fuerit, patitur diffi-  
 cultatem, quoniam corporeitas vt ita dixerim non est ratio cu-  
 ius auxilio ab alijs scientijs separatur, cum circa res corporeas  
 etiam uersentur mathematicæ, atque cum multa sint in natu-  
 rali philosophia tradita, quibus ratio corporis non debetur,  
 quem-



quemadmodum materia prima, primum mouens humanus intellectus, non possunt res ipsæ corporeæ statui pro communi genere totius naturalis philosophiæ.

Vnde etiam incommoda satis est eorum Latinorum opinio qui corpus mobile, materiã esse uoluerunt cum in lib. physicarum Aufcul. nulla sit de corpore facta mentio à Philosopho, quoniã primus liber in quo de corporibus agitur, est liber de cœlo, quod Arist. indicauit cum in exordio eius operis dixerit scientiam de natura fere plurimam non autem omnem uersari circa corpora, magnitudines, passionēs horum & motus. siquidem primum mouens omnino sit in corporeum, nec non & anima humana, quam in mixtam impassibilem nullius corporis actum in 3. de anima statuit Arist. atque cum probetur in 6. phys. corpus mobile esse, non potest pro totali genere constitui in naturali disciplina.

Thomæ opinio etsi apud plurimos recepta sit, nulla etiam, mea quidem sententia, esse videtur, quoniam Arist. entis partes à substantia & accidenti accepit, non autem ab ente mobili & immobili, nulla enim, secundum ens mobile atque immobile diuisio ab Arist. in Metaphys. facta fuit, ut pro diuersitate generis scientiarum multitudinem declararet, sed tantum penes primas entis partes, quæ sunt substantia & accidens. Præterea si de ente mobili esset naturalis philosophia, dicendum foret metaphysicam esse de ente immobili, & per consequens illam esse scientiam particularem, nō autem communē quemadmodum omnes fatētur cum sit de ente simpliciter Metaphys.

Scoti opinio etsi fuerit Doctoris subtilis, fatua est, & indigna tanto doctore, quoniam finitum ueluti infinitum est passio ipsius quanti, non autem substantiæ, etenim etsi finitã esse omnem substantiam corpoream sit necessarium, attamen esse finitam non est passio eius substantiæ, quæ naturalis est, præterea per substantiam finitam non separat à Metaphysica, quæ substantias separatas & numero finitas contemplatur, nec non ab Astronomo minime discrepabit, qui corpus cœleste, quod



quod est substantia quædam finita & sempiterna contemplatur. Amplius si est substantiæ finitæ, Naturalis nequaquam supponit, cum in primo Phy. Auscul. infinitum, secundum magnitudinem numerum & speciem non dari, demonstrare cogatur, Arist.

Duæ itaque postremæ, quæ eandem vim apud me habent, Peripateticæ sunt & auctoritate Arist. satis dignæ. Res inquam sensibiles secundum, quod mutabiles, aut substantiam ipsam sensibilem, quæ à motu non separat, genus commune toti philosophiæ naturali esse, cuius principia partes atque passionēs speculantur, atque de quo ipsum quid est atque si est supponuntur, quod ita se habere non modo à dictis Arist. peti potest verum etiam & ratione comprobari. Nam philosophus 6. Metaphy. primo differentiam scientiarum speculatiuarum à subiecto genere indicans, de substantia metaphysicam, & naturalē agere dixit, de accidentibus aut Mathematicas, at cum de substantijs diuersis tractare oporteat, naturalem & diuinum plurimum in 12. Metaphy. 5. quæ nam substantiarum Naturali cōtemplationi & quæ metaphysico subiecta sit ostendit, atque eā quæ sensui comprehenditur cum æternam tum ortui obnoxiam Naturali concedit, intelligibilem autem perpetuam atque immobilem ipsi Metaphysico. Quod quidem magis declarans Themistius, inquit, cum nihil sit commune substantiæ sensibili & intelligibili, aut in generatione, aut in loco, aut in augmento, aut decremento, nec in principio à quo producantur Naturalis sensibilem, quæ à motu minime separat assumit, intelligibilem autem atque immobilem Diuinus philosophus, quod etiā ab Arist. in 7. Metaphy. 42. clarum habetur. Illudq. rationes ita esse ostēdunt, etenim cum de subiecto si est & quū est in scientia supponantur, à metaphysico vtrumque accepit Naturalis, qui de substātia tum sensibili tū intelligibili ut sunt substantiæ considerat, illiq. tantum ipsam mobilitatem adiungit, de qua nullam curam habet Metaphysicus, qui à motu & à materia separare solet.



Amplius cum Analogum genus esse debeat, speciebus ab eo contentis, hæc substantia per prius de sempiterna, per posterius vero de caduca prædicatur, nihil est in naturali philosophia primo intentum, de quo substantia hæc non prædicetur.

Partes præterea atq; passionēs huius substantiæ nec nō principia Naturalis philosophus tractat, principia n. sunt materia & forma partes corpora omnia simplicia & mixta. Passio autē motus qui est passio omnibus rebus naturalibus communis. Nec me mouet cuiusdam viri grauissimi auctoritas, qui à me primum hanc veritatem intellexit, anteq̃ Them. paraphrasem quæ nunc in lucem prodijt, perlegissemus, q̃ frustra addita sit à nobis ea particula in quantum mobilis, propterea q̃ idem sit mobile, quod sensibile, subiecto. n. eadem esse fatemur attamen vbi ad scientiarum considerationem relata sunt, nō eadem est ratio sensibilis & mobilis, quoniam de sensibili agit Metaphy. non minus q̃ de intelligibili, immo maior pars Metaphysicę est de substantia sensibili, minima autem de intelligibili, cū de hac in 12. tantum libro agat Arist. itaque assumens substantiam sensibilem Naturalis, qui Metaphysico subiicitur, illi motum ipsum adiungit, quod Auer. & Them. quos apertos habemus dixerunt, substantiam sensibilem, quæ à motu non separat naturalem philosophū contemplari, quod quidem ab Atis. obseruatum videmus, qui Metaphy. 12. de substantijs separatis atque immobilibus se dicturum pollicetur. non enim altero fuit cōtentus. De substantia enim sensibili vt substantia est agit Metaph. vt mobilis Naturalis.

Quæ autem Naturalis negotij partitionem expediunt, nullam difficultatem secum habent, quoniam apud omnes receptum est, in duas primum partes totam naturalium rerū scientiam secari, in eam videlicet, quæ magis communium esse fertur, in qua ea tantū pertractantur, quæ communiter omnibus naturalibus insunt, cuiusmodi sunt principia prima, & quę res omnes naturales cōsequuntur, motus, tempus, locus, vacuum, infinitum & continuum, quorum tractationem prosequitur Arist.



Arist. in opere, quod physicā auscultationē appellari voluit, in quibus ea primum tractat, quæ ad materiam formam & priuationem spectant, quibus cetera succedunt, quæ ad motū, tempus, locum, & motus species, nec non ad primi mouentis contemplationem conducere videntur. Altera autem pars illa est, quæ minus communium tractationem suscipit, quæ quidem à magis simplicibus ortum habent: inter quæ primas partes obtinuerunt lib. de cœlo, in quibus de primis corporibus agitur cœlo videlicet, & quattuor elementis.

Quos quidem libri de ortu atque interitu insequuntur, in quibus de elementis, quatenus sunt prædita primis qualitatibus actiuis atque passiuis, nec non ut sunt materia generationis atque corruptionis inferiorum omnium differitur, quibus partes illæ succedunt, quæ de mixtis omnibus pertractant, inter quas, quæ de imperfectissimis esse perhibentur, priores existunt. quemadmodum opus Meteorologicum, in qua de illis mixtis sermonem habet Arist. quæ ex vtraque exhalatione ortum habent, quorum tractationem mistorum perfectorum notitia consequitur, quæ cum animatorum sit atque in animatorum, quæ in animatis ut metallis debetur, natura prior esse putatur, in animatis autem ea, quæ animalium esse fertur, omnem quam de plantis habemus disciplinam, antecedit, quoniā plantæ ex cognitione eorū quæ animalibus insunt, facilius innotescere uideantur. Cum tamen quoniā simpliciores sunt, anteire deberent. Quorum finis sunt ea, quæ animantium formam declarant, quorum contemplatio ad libros de anima demandata est, quos postmodum libri paruorum naturalium in quibus de animantium operibus contemplationem exercet Arist. subsequuntur.

Ab ijs autem ordo & numerus partium philosophiæ Naturalis dependet, quem nobis ipse Arist. in exordio operis Meteorologici indicauit, cum inquit. De primis igitur causis Naturæ & de omni motu naturali: Adhuc autem de recte dispositis secundum superiorem lationem astris, & de elementis.



corporalibus, & quot & quæ: & de ea, quæ ad inuicem transmutatione, & de generatione & corruptione communi dictum est prius. Reliquum autem huius Methodi est adhuc considerandum, quod omnes priores Meteorologiam uocabant: Hæc autem sunt quæcumque accidunt secundum naturam quidem, inordinatiorem tamen primi elementi corporum, circa locum maxime propinquum lationi astrorum, & de lacte, & cometis, & ignitis, & motis imaginibus, & quæcumque ponemus utique æris esse communes passiones, & aquæ. Adhuc autem terræ quæcumque species, & partes & passiones. Partium ex quibus, & de flatibus & terræmotibus considerabimus, utique causas & de omnibus quæ fiunt, secundum motum horum. Adhuc autem & de fulminum casu, vorticibus & accensis turbinibus, & alijs circularibus, quæcumque propter congelationem accidunt passiones, eorundem horum corporum. Cum autem pertransiuerimus de his, speculabimur si quid possumus dicere de animalibus & plantis, vniuersaliter & sigillatim. Ferè.n.his dictis, finis utiq; factus erit totius eius quod à principio nobis propositi.

Quæ res propter libros de anima & paruorum naturalium ab Arist. addita fuit, quoniam in illis constitutus est finis vniuersæ tractationis de natura. Postremo autem loco animam collocauit, quoniam anima si comparetur partibus animalium & plantis, rationem formæ habet, Materiam autem in tractatione, quæ naturam imitatur formam antecedere patet, quoniam imperfectissima est, forma autem cum perfectio sit, dignior atq; nobilior existit. Atque quemadmodum inquit Alexander, Animæ notitia commode haberi nequit, nisi ipse possidentis Animæ apparatus primum cognoscatur, nec non partium omnium dispositio, quoniam ipsæ cognitæ non trahemur tandem in admirationem, quomodo Anima tot operationum princeps esse possit. Animalia autem plantas, quæ simpliciores sunt, propterea antecedunt, quoniam plantarum partes ad similitudinem earum, quæ insunt animalibus, facilius cognoscuntur.



scuntur itaque in omni disciplina à notioribus exordiendum sit, ob hanc causam de animalibus tractationē anteposuit Arist. ei quæ de plantis. vt iam alium ordinem excogitare per absurdum sit in partibus philosophiæ Naturalis, nec non numerum qui octo partibus clauditur.

Quibus hunc in modum ad mentem Arist. constitutis, nihil relinquitur, quod veritatem hanc oppugnare debeat: etenim quæ in principio lib. de sensu & sensili uidentur libros de anima præponere libris de animalibus, nullius sunt momēti, quoniam non de animalibus quantum ad eorum partes & materiā dicere promittit, sed de operationibus communibus & proprijs animalium & vitam habentium, de quibus recte differe-re non poterat, nisi forma & materia animalium & viuentium perspecta.

Alterum autem sumi solet ab Arist. in 2. de generatio animalium cap. 3. quoniam inquit in eo opere in lib. de Anima determinatum esse, quare anima vegetatiua & sensitiua intellectiuam antecedant, quoniam hoc non ait Arist. vt ordinem definiat, sed ut ad memoriam reuocet, quæ ad rem propositam faciunt, nè in scientia inutiles contingant repetitiones.

Perabsurdum etiam apud me est Recentiorum inuentum, quòd libros de generat. animalium Ioannis Gram. aut decepti, quem in exordio physicarum Auscul. minime intellexerunt à lib. de historia & partibus animalium separauerint, & inter paruos naturales reposerint, cum in lib. paruor. naturalium nō tantum de operibus animantium sed etiam viuentium omnium agat

Aris. quorum in lib. de gener. animalium nulla ratio habetur.



# ARIST. PRAEFATIO

## ET IN EAM ANTONII BERGAE

### COMMENTARIUS.

#### Particula I.

*Quoniam cognoscere ac scire contingit circa omnes  
scientias, quarum sunt principia aut causæ aut  
elementa ex horum cognitione.*

**M**aximum studium res naturales postulare, ut cognoscantur, in primis dignitate proposita, quemadmodum in omni præfatione facere solet, Arist. mea quidē sententia, indicare videtur. Quandoquidem hominibus, qui ratione atque intelligentia uti debent, satis illa cognitio esse nō potest, quæ sensibus solum utitur, sed ut eam sibi etiam adiungant opus esse censetur, quæ ex vniuscuiusq; rei principiis originem sumit, quoniam perfectissima cum sit, animum ipsum recte instituit, nec non ad ipsam contemplationē ducit. Quod sanè præceptum cum Naturam ipsam immittetur diuinū extat quoniam ubi quidpiā efficere studet, totius actionis initium à primis simplicissimisq. causis suscipit, materiam primum parans, deinde uero formam ipsam introducens, ut ex utrisque naturale corpus infurgat, quod varias exerceat operationes, quod ita se habere Artes factiue declarant, quæ in materia corporea atque sensibus ipsis subiecta versantur, quoniam edificator materiam domus antea componit, deinde autē totius formam in fine operis introducit. Manifestum, itaque est idem in scientiis, quæ sunt ipsarum rerum contingere, siquidem ille causas cum habeant, ex quibus constare uidentur, earum auxilio etiam innotescere, operæpretium fore, patet.

Quod Arist. ab una propositione, quæ inter ueriores collocatur,



locatur, auspicatus, ita rem se habere in scientia naturali proponit, testimonium præterea subscribens, ab ipsa existimatione sapientum acceptum, ut demum quidnam primum in rerum naturalium cognitione intelligere, debeamus, aperiat: in quo operis de physica auscultatione materiam positam esse constat. Nec præter rationem adeo communi exordio utitur, cum omnium sententia receptum sit, in hoc opere illa tantum explicari, quæ rebus omnibus naturalibus communia esse perhibentur: itaque communia cum non nisi communibus interponi debeant, recte Arist. Totius quæ de Natura est contemplationis, procæmium in principio librorum de physica auscultatione collocavit: quod illius materiam aperit, nec non Methodum atque ordinem, quibus in tota hac disciplina uti oportebit. Huius autem operis, quod de principijs & de motu esse fertur, intentionem in hac prima particula huiusmodi ratione colligere videtur, Scientia habens principia causas & elementa ex eorum cognitione nobis accedit. Scientiæ de natura sunt principia causæ & elementa, quoniam res naturales, quæ hæc habent contemplatur. Igitur in scientia Naturali à principijs causis atque elementis est incipiendum.

Quod si minorem omittere voluerimus, non incommode ratiocinatio hoc modo conficietur, quoniam omnis scientia habens principia, illis præcognitis accedit, igitur in Naturali scientia, cum illa habeat, ab ipsis exordiendum erit: ut particulam Cum, siue quoniam demere opus non sit, quoniam antecedens veluti concessum sumitur, ad quod si ad Enthymema rationem reduxerimus, consequens recte consequitur. Potest Arist. ratiocinatio etiam rebus accommodari, ut si dicamus Res quarum sunt principia aut causæ, aut elementa, illis cognitis innotescunt: Res naturales cum sint compositæ, illa habent, igitur in rerum naturalium præceptione, ab illarum principis est inchoandū: occasionē tamen à scientia Arist. capere, videtur, quæ res ipsas contemplatur, quoniam scientia perfecta cum sit per causā, ut scientia naturalis quæ una speculatiuarum est, per



causas accedat manifestum esse debet. Quare non est ut demon-  
 strems id, quod pro minori propositione subijci potest, sciē-  
 tiam naturalem habere principia causas & elementa, quoniam  
 quemadmodum Porphy. existimauit à Diuino philosopho il-  
 lam petere licet, qui scientiarum speculatiuarū principia cau-  
 sas atque elementa esse docuit: cogitur autem Theoph. qui ra-  
 tionem rebus accommodauit, minorem interponere atque ex  
 eo ostendere, quoniam res naturales compositas esse manife-  
 stum est: quodcumque tamen sequuti fuerimus, mentē Arist.  
 non variat, quoniam scientiam ipsarum rerum esse, satis con-  
 stat: quod autem dubitationem insurgere facit, illud apud me  
 est, quoniam quæ nam sint illa principia, à quibus exordiri  
 debeamus, non multum patebit, quoniam scientia ipsius Ar-  
 tis Res autem sua principia magis postulabunt, utrumque ta-  
 men in speculatiuis scientijs, quæ res contemplando demon-  
 stratione vtuntur, accidit, quoniam artis & rerum principia se  
 se concomitari uideantur: artis uero, quæ Theoremata sunt  
 antecedunt, quoniam demonstratio, quæ ad res ipsas ferri so-  
 let, illis uti debet, quod ubi non animaduernerent Arist. inter-  
 pretes, illos in hanc usque diem ualde turbauit, de quo in quar-  
 ta particula fusius dicemus, in qua tota difficultas posita esse  
 uidetur.

Dixit autem Arist. omnes scientias quarum sunt principia,  
 propterea quod non omnis scientia proprijs principijs utitur,  
 veluti illæ, quæ diuersarum scientiarum principia sibi accom-  
 modant, qualis Dialectica, quæ omnes scientias ingreditur, ef-  
 se perhibetur, quæ communibus & alienis utitur, ut cum cir-  
 ca materiam medicam, aut naturalem uersatur, illa siquidem  
 scientiæ omnes veluti instrumento vtantur, quod pluribus in-  
 seruire apta sit. Cuius generis etiam Rhetoricę fore censē-  
 tur, & ceteræ artes, quæ definiendo & diuidendo tantum  
 procedunt, non autem demonstrando, quemadmodum Ars  
 Galeni medicinalis esse putatur, & tota pars curatiua, in Ar-  
 te medica. inter quas illæ non sunt connumerandæ, quæ de-  
 mon



monstratione signi vtuntur, quemadmodum grauissimi quidam inter recentiores Arist. interpretes putauerunt, quoniam cum sit species demonstrationis quia, principia tantum habent propria artes, quæ illa vtuntur, per scientiam autem non nisi perfectam intelligit, quoniam hæc sola uidetur principia sibi vendicare, cum sit per ipsam causam, quod ut Arist. indicaret non solum dicitur cognoscere, sed scire, ac si velit eā nos cognitionem intelligere, quæ per ipsam scientiam accedit. ita ut per cognoscere quid communius ipso scire intelligat, quoniam cognitio ad ipsam opinionem traducitur, quæ cognitio quædam est, veluti inquit Plato auctore Simplicio, scire autem tantum ei cognitioni debetur, quæ à causa propter quam res est, ortum habet, atque in tam communi præfatione potuit utroque vti Arist. atque alterum per alterum exponere, cuius gratia si nominis locus est in scientijs demonstratiuis: quare diuersa minime declarant ut per cognitionem siue per intelligere definitiuam, per scire autem demonstratiuam Arist. intelligat, quoniam hic non est sermo de instrumentis scientiarum, sed de scientijs ipsis, atque in hoc cōi procæmio non est opus ut ad hæc duo cognitionū genera interpretationem referamus, quemadmodum Thomas putauit. An vero scientias an potius Methodos & doctrinas legendum sit, etsi maximi momenti esse non uideatur, melius tamen est ut sciētias legamus, quæ & artis & rerum principia habent, non autem Methodos, cū nihil aliud esse uideatur ipsa Methodus quàm habitus quidam qui uiam præstat cum ratione, atque tantum Artis principia postulare, Methodus enim etiam in illis uersatur disciplinis, quæ non sunt ipsarum rerum, & quæ demonstratione minime vti videntur. Legere autem Doctrinas tantum abest, ut totam Arist. artem tollat, atque quoniam Doctrina etiam illis disciplinis tribuunt, quæ proprijs principijs non utuntur, quibus propositio ab Arist. proposita, nullo modo conuenire potest. Quapropter non bene faciunt illi qui in Arist. versione suum potius genium, quam ipsam rationem sectantur. vt fucatis eorum



rum verbis laudem aliquam aucupentur.

Tota vero difficultas, quæ in dictis Arist. haberi potest, in vocabulis principia causæ atque elementa consistit.

Auer. tribuit Alexandro, per principia causas agētes & mouentes intelligi, per causas finem, per elementa vero materiam & formam, quoniam proprie illis vtitur Arist. quod sermo disiunctius indicare uidetur, quam sententiam sequitur Auer. propterea quòd non omnibus scientiæ omnes vtantur, quoniā Mathematicæ formalem tantum causam admittunt, Metaph. autem materiam ipsam derelinquit, Naturalis autem circa omnes solus uersatur, itaque ut hic scientiarum diuersitas significaretur, aliud per hæc vocabula hoc loco intelligere minime oportet. Quod etiam sermo dubitatus inquit Auer. ita esse ostendit.

Simplicius Alexandro imponit, quòd Eudemum sequatur, quoniam per causam non solum finem sed etiam formam, per elementa autem materiam tantum intellexerit, quoniam uere elementum si alijs causis comparetur, materia dicitur: forma uero cum sit terminus mutationis, uidetur esse id cuius gratia, efficiens autem causa cum sit vnde motus dicitur principium.

Ioannes Gram. cum videret rei huius difficultatem, duo proponit, aut principium & causam in eadē significatione pro efficiente & fine sumpta esse, elementa uero pro materia & forma, aut communiter principij nomen usurpatum esse causa pro efficiente & fine elementum itidē pro materia & forma.

Porphyrus autem per principium & causam eadem intelligi putauit, etsi principium magis patens sit ipsa causa, quoniam tot modis dicitur ipsum principium, quot causa dici solet, ita ut subiecto eadem sint, sola vero ratione discrepare videantur, quoniam principium dicitur quatenus antecedit, causa quatenus quidpiam efficit, quod aperte ab Arist. v. Metaphy. scriptum est in cap. de principio & causa.

Recentiores qui elegantes commentarios ediderunt hæc vocabula omne genus causæ significare uoluerunt, quod ynumquodq;



quodque significare aptum est, aut certe si non omne, ea quæ elementi vocabulo significantur, nempe materiam & formam, à quibus rerum naturalium tractationem Arist. auspicatur, ita ut per principia nihil aliud intelligat, quàm ipsa elementa. Quoniam materiam primam uere elementum esse, in cap. de elemento ab Arist. habetur Metaphysi. quinto. quo etiam forma digna est cum & ipsa inesse videatur rebus ipsis, quemadmodum materia. in quo quidem Simonem Porcium illustrem Philosophum insequuti sunt, qui nihil ad rem hanc attinere putauit, siue causas siue principia siue elementa dixerimus, quoniam ab illis, quæ rationem principij & causæ habere uidentur, cum prima sint semper incipere decet.

Simplicius Themistium sequutus, Per principia id quod commune est causis atque elementis intelligi putauit, quoniam principium dicitur non solum de principio transmutationis, sed etiam de quattuor causis ex Arist. quinto Metaphy. quarto. unde omnis causa est principium, omne uero principium causa non est, propter priuationem ad cuius esse nihil sequitur. Quod ita se habere etiam particula disiunctiua indicare potest principijs apposita, ita ut proprie illis minime utatur Arist. quoniam proprie illis uti huic loco adeo communi non conuenit atque singulatim de illis dicere ad Metaphy. pertinere videatur.

Sententijs interpretum enarratis: ut ambiguitates omnes diluamus, & veram Arist. mentem assequamur, ut de illis iudicium faciamus, operæpretium extat.

Vt autem à prioribus auspicemur, quæ propriè illis uocalis uti Arist. putauerunt, atque non in omnibus scientijs omnia, quæ hæc significant reperiri. Aristoteli omnino repugnare videntur, propterea, quòd in sexto Metaphysi. statuat scientiarum speculatiuarum maxime principia causas atque elementa esse, ac si nulla sit, quæ omnia hæc non admitat, quoniam Mathematicæ materiam habent cum sonorum,



numerorum atque magnitudinum passionibus probent, à materia minime, quæ illis propria est, abscindunt, quam intelligibilem esse patet, atque illis propriam & accommodatam. Metaphysicam autem, quæ ens simpliciter speculatur, principia & causas entis inuestigare, nulli dubium est, cum illud affirmarit Arist. atque de omni causarum genere considerare, quoniam de causis, ut causæ sunt Metaphy. mentionem facere, oportet. & eminenter ut ita dixerim de omnibus, quæ scientiæ illi subiectæ dicunt, tractare debet. In Artibus etiam factiuis hoc patet, quæ intellectu utuntur, quoniam Medicina calidum & frigidum, humidum & siccum pro principiis accipit & causis, humores autem cum membris tum similaribus tum dissimilaribus pro elementis corporis humani, quæ quidem si diuersis in scientia consideratis tribuantur, possuntque modo principij rationem habent, eam quæ elementi est sumere, ut si calidum frigidum humidum & siccum temperaturarum tum simplicium tum compositarum elementa esse dixerimus, quoniam elementum nihil aliud, quam proximum & immediatum rei principium, significat, in qua quidem significatione materia & forma prima rerum naturalium principia simplicium & primorum corporum elementa appellari possunt, & in Mathematicis immediate propositiones, à quibus Euclides in libro suo quem Elementa conscripsit, auspicatur.

Mirum præterea est, quomodo nam si proprie ijs uocabulis utatur Arist. nullam causarum atque elementorum mentionem in conclusione ipsa habuerit, quare de Auerrois Alexandri atque Eudemi sententia non est ut rationem aliquam habeamus, qui hæc proprie accepta fuisse putauerunt.

Recentiores autem, etsi in eo recte sentire videantur, quod minime illis uocabulis proprie utatur Arist. nihilominus in eo grauiter peccant, cum elementa hic significari crediderint, & ab illis Arist. exordiri, quoniam in primo & secundo libro huius operis, de materia & forma agat, quæ elementi nomine digna sunt, quemadmodum elementi ratio in v. Metaphy. allata ostendit,



ostendit, quod ita esse, non potest, cum priuatio de qua agitur in primo libro, nullo pacto elementum, quemadmodum principium, quod mutationi debetur, appellari ualeat, sine qua cum principiorum numerus statui nō possit, elementum intelligi non debet, quod si intelligeretur, quemadmodum dicunt, mirum est, quare elementorum in conclusione non meminerit Arist. atque etiam in testimonio omnia repetat, ac si principiorum causarum atque elementorum cognitio desideretur, ut res naturales perfectæ intelligantur. Cui illud accedit quod tantum elementa naturali tribuant, quod alijs vitio vertunt cū in Naturali principia causæ atq; elementa reperiātur.

Nemo præterea tam parum est philosophiæ studijs initiatus qui tam leui ratione obscuritatem hanc non euitaret, siue in disciplinis fuerint causæ siue principia siue elementa ab illis initium sumi debere, hoc enim, disciplinis non accidit, sed rebus cum tractantur. Quare in omni disciplina omnium considerationem facere opus est.

Ad Eudemum autem dicendum puto, fieri non posse in rebus naturalibus, vt materia tantum nomen elementi suscipiat, non autem forma. Cum forma illud sit propter quam res esse dicitur: materia vero ob quam fieri uidetur.

Porphyrius vero an sit dignus reprehensione, apud me dubiū est, quoniam & si dixerit æquale esse ipsum principium causæ, quoniam totidem modis dicatur, non tamen negauit principium causa cōmune magis esse, quare per principium potuit etiam quid commune causis atque elementis intelligere, quoniam de causis omnibus principium dici, atque causam in plus se habere. v. Metaphy. scribit Arist.

Quare cum Themistio & simplicio laudem meretur, proprie nequaquàm vsum fuisse Arist. his vocabulis, nec non principium pro quodam communi ad causas & elementa acceptū esse, quod conclusio Arist. indicat, & quia aliter nos in testimonio dicere non cogat, quemadmodum Auer. cōtigit, tum quòd scientiæ omnes speculatiuæ hæc tria admittant, cum in



rebus quas pertractant vt plurimum priora & posteriora principia reperiantur. Ita vt ab illis principium initiũ faciat Arist. quæ aut causæ tantum sunt, aut causæ aut elementa.

In quo sane cum nihil certi dicat Ioan. Gram. nihil etiam contra eum cogimur afferre, per particulam contingit non verum contingens, sed illud quod cum necessario conuertitur intelligit Arist. vt si dixerimus contingere cras solem oriri, data mundi æternitate, & hominem mori propter materię necessitatem.

*Tunc enim arbitramur unumquodque cognoscere, cum causas primas cognouerimus, nec non principia prima vsque ad elementa.*

Antecedentis siue maioris syllogismi propositionis testimonium ijsce verbis Arist. subscribit, quod quidem demonstratio non est sed quædam vt ita dixerim disciplinę maneries, qua quidem in illis vti solemus, quæ veritatem multam habent: supremum tamen certitudinis gradum minime obtinuerunt, cuius generis illæ sunt propositiones, quæ per contradictionem proferuntur, vt quòd sit necesse vnum esse principium aut plura & de quolibet aut affirmare, aut negare. Medium enim cum nequaquam admittant alterum fateri cogimur, quare nulla indigent ostensione quemadmodum illę, quæ mediæ vocantur inter maxime notas atque ignotas propositiones: à, quibus suas præfationes optimos Rethores Arist. sequutus exordiri solet quemadmodum in principio Metaphy. & post. obseruauit etenim cum facile illis omnes nõ assentiant etsi uere existant leui quadam indigent suasione, quæ aut inductio est aut testimonium à communi quadam opinione acceptum, quod particula arbitramur interposita declarat.

Nec sine ratione testimonium à rebus sumit, quoniam scientia est ipsarum rerum quarum principia contemplatur. Per principia & causas etsi particulam primis adiunxerit quidpiam diuersum ab eo, quod in maiori dictum est, intelligi nõ debet quoniam



quoniam primæ causæ siue prima elementa ibi intelliguntur, à  
 quibus scientia, quæ naturam immitatur, exordiri debet, quo-  
 niam Natura ipsa semper à simplicissimis, quæ vere prima sunt  
 initium suæ actionis desumit: ex quo patet quantum à vero  
 aberrauerint Recentiores, qui per primas causas & prima prin-  
 cipia proximas atque immediatas significari uoluerunt quo-  
 niam etsi Arist. aliquando particula primum pro illis vtatur, at-  
 tamen quando primum ipsi per se non adiungitur proximum  
 non significat sed summum & remotissimum in vnoquoq; ge-  
 nere, quemadmodum in 2. libro huius operis patere potest cū  
 inquit in cognitione perfecta rerum summā siue primam cau-  
 sam quærendam esse. Quare per elementa immediatas & pro-  
 ximas causas intelligi uolumus etsi Arist. Elementum aliquan-  
 do ad materiam primam, quæ remotissima est traducat. ita ut  
 non adiungat eam particulam vsque ad elementa vt sit explica-  
 tio eius quod dixit principia prima quemadmodū Vicomer-  
 catus Peripateticus insignis in suis commentarijs putauit: & vt  
 ordinem solum denotet inter principia proxima & immedia-  
 ta non autem inter remota & proxima: qm̄ tunc satis fuisset  
 Arist. sermonem facere de proximis & immediatis rerum prin-  
 cipijs, non autem de remotissimis omnium rerum naturalium  
 quæ materia forma & priuatio esse censentur cum in omni mu-  
 tatione reperiantur. quō autem priuatio elementum appellari  
 possit non video, nec alicubi illam nomine elementi dignā esse  
 statuit Arist. causa autem cum sit mutationis, quoniam absque  
 priuatione materia formas nō appeteret principii & causæ no-  
 mine appellari potest. ex quo etiam patet quantū hallucinatus  
 fuerit cū per prima intellexerit elementa cū de priuatione agat  
 quæ etiam non est vt ex elementi definitione allata est manife-  
 stum. Præterea hæc sentētia destruit Arist. in quarta particula  
 cū ab vniuersalibus ad singularia incedēdū esse cōcludit. Quat-  
 tuor autē elemēta proxima sunt si illis cōparētur, qm̄ tantū re-  
 bus ortui atq; interitui obnoxijis propria sūt materia prout pri-  
 mis qualitatibus actiuis & passiujs prædita sunt, quemadmodum  
 Arist.



Arist. in secūdo de elementis scriptum reliquit. Quare leuiter Auerroim reprehendunt nec idem vsu uenit in Mathematicis, quod in Naturalibus fieri videmus, quoniam Mathematicæ illis tantum principiis utuntur, quæ in propositionibus siue definitionibus constituta sunt, à quibus immediate id quod volumus deduci potest.

Quod ita se habere Them. exemplo ostendit quoniam in dictionibus litteræ sunt prima principia, syllabæ vero ipsa elementa in quas littere dissoluuntur: priori itaque loco prima principia, quæ remota sunt deinde autem elementa quæ proxima sunt declarari debent. Hoc enim testimonium cū à sapientum opinione pendeat remotarum causarum & earum, quæ proxime sunt, mentionem continere debet, quod ubi non animaduersi sunt Recentiores ueram huius loci sententiam reliquerunt, quam Græci omnes maxime sequuntur, præter Ion. Gram. qui utramque proponit, quod quidem mea sententia facere cogitur: quoniam dixit Arist. vnumquodque sic cognosci atque cū in particulari eorum, quæ in sublimi generatur naturam querimus talem ac talem materiam accipimus utramq; exhalationem: postea vero ad materiam primam & formam descendimus. quæ sunt earum impressiōum principia quatenus sunt corpora. locus tamen hic in quo in vniuersum de cognitione rerum agitur, requirit ut per primas causas remotissimas: per elementa autem proximas intelligamus.

Quod quidem in omni causarum genere locū habet. principia enim, propinqua rerum cum non sint eadem est necessarium in notitia illarum absoluta principia eadem atque diuersa cognoscere.

*Manifestum est, quod & ea, quæ sunt circa principia scientiæ, quæ de natura est, primum determinare tentandū.*

Conclusionem prædictis Arist. adiungit, quæ materiā operis de physica Auscultatione exponit, quæ quidem in principiis rebus naturalibus communibus constituta, est nec non in illis, quæ



quæ res ipsas naturales consequi videntur. Nec est accusandus Arist. quod rectam syllogismi cōclusionem reliquerit, cum eo cōsilio illud factum sit, vt omnem horum librorum materiam insinuaret, quæ in illis versatur, à quibus Naturalis disciplina principium facere debet, quorum cognitio cum difficillima sit, dixit tentandum esse de illis determinare. Hæc itaque conclusio ad rectam conclusionem veluti consequens sequitur, ac si diceret Arist. si res naturales suis principijs intellectis cognoscuntur, igitur de principijs primum, est tentandum sermonē facere. A quo autem principiorum genere initium sumi velit Arist. dubium adhuc esse uidetur, quoniam eorum cum alia sint ipsarum rerum: alia vero ipsius artis & nondum patet an vtrumque intelligat an alterum tantum principiorum genus, quod tantum ipsarum rerum esse fertur, quæ in Arte tractari debēt. Etenim etsi vtrisque principijs vtatur propter eas demonstrationes quas de rebus facere oportet: cū tamen a scientia, quæ est ipsarum rerum naturalium, occasionemumat primum ea principia, quæ sunt causæ aut elementa rerum naturalium intelligi debent, quoniam illis fieri non potest, quin in perfecta rerum omnium cognitione non utatur Arist. nec communissima principia intelligi debent: sed illa, quæ Naturalis philosophia patitur quoniam suprema rerum principia Metaphysicus docet. talia enim, quæ sua sunt vnusquisque Artifex tradere potest. Vnde Medicus calidum frigidum humidū siccum pro elementis accipit ad humani corporis contemplationem: non autem ea elementa, quæ sunt materia omnium generabilium & corruptibilium, quæ ad Naturale philosophum spectant, ita vt Medicus communissima nō tractet humani corporis principia: sed ea, quæ sibi propria fore censentur, vt sunt calidum frigidum humidum & siccum priora, humores autem & membra posteriora.

Cum autem in conclusione tantum principiorum meminisse Arist. videamus, non autem causarum atque elementorum indicium est ipsum principium pro quodam cōmuni ad causas



fas atque elementa accepisse à quibus Naturalem disciplinam auspicatur. Ita vt hæc principia communes causæ materia forma efficiens & finis esse dicantur . atq; in vniuersum ipsius mutationis cuius etiam priuatio principium dicitur principia.

### Particula III.

*Innata autem est ex notioribus nobis uia & manifestioribus ad manifestiora natura & notiora .*

Proposita huius operis materia quæ quidem in primis rerum naturalium principijs constituta esse videtur, cum minime expeditum sit in principiorum notitiam deuenire . Propterea q̃ simplicissima sint & à sensibus remota viam siue Methodum in hac particula nobis proponit Arist. qua' in cognitione principiorum vti debemus atque in ceteris rebus naturalibus quæ difficillimam cognitionem habent. quæ sanè Methodus in ea demonstratione versatur , quæ à posterioribus ad priora incedit quoniam ea demonstratio, quæ à prioribus ad posteriora progredi solet, ad ipsorum principiorum cognitionem commoda esse non potest . Etenim quicquid cognosci debet cum sui natura notissimum sit uel pœnitus ignotum, quæ ignota sunt demonstrationem aliquam requirunt, inter ignota vero rerum naturalium principia esse uidentur quoniam & à sensibus ipsis remotissima sunt, nec de illis philosophi antiqui cōueniant quare opus est ut auxilio eius, quod notius est nobis adueniāt, quod cum duplex sit natura & nobis à notioribus natura principiorum demonstrationes peti non debent: primum quidem quoniam naturam principiorum tolleremus cum de ratione principij est, quòd sit primum deinde vero quoniam esset forte necessarium in infinitū abire, cum illorū principiorum alia quærenda essent principia. Quare ea tantum demonstratio opportuna erit, quæ à notioribus nobis & posterioribus natura

ad



ad priora & notiora natura incedit in qua Methodus ipsa constitui debet: Nihil enim in rebus naturalibus adeo est difficile, quod huius demonstrationis auxilio nō assequamur, siue esse siue naturam ipsarum rerum quæramus. Materiā enim primā esse mutua contrariorum actio & passio, quæ sensibus patet ostendit, naturam autem illius Analogia declarat. Multiplices autem animæ vires eorumq. naturas variæ & diuersæ animalium operationes: etenim in senio intelligere cum non marcescat à corpore minime intellectum dependere nec organo corporeo vti: quemadmodum vegetatiuæ atque sensitiuæ accidit indicauit. actionem enim impassibilem à virtute impassibili prouenire opus est. Esse autem hanc viam necessariam huiusmodi ratione Arist. concludere uidetur, innata est nobis via ut à notioribus nobis ad notiora natura incedamus in scientijs in quibus non sunt eadem nota nobis & simpliciter, in scientia naturali sunt hæc notiora diuersa & separata, igitur in contemplatione principiorum & aliarum rerum naturalium est necessarium ut à notioribus nobis ad notiora natura progrediamur. cuius fanè rationis Arist. maiorem tantum propositionem cū causa siue ratione in medium attulit cum conclusione, omit- tens minorem.

*Non enim eadem sunt nobis nota & simpliciter. Quare hoc modo necesse est ex ijsce, quæ natura minus manifesta sunt nobis vero notiora ad ea, quæ apertiora magisq. nota natura sunt proficisci.*

Rationem subscribit Arist. quæ maiorem propositionē ab eo allatam comprobare videtur, ut ex ijs, quæ concessa sunt veram conclusionem deducere possit. Esse autem innatam viam in sciētia Naturali ut à notioribus nobis ad notiora natura progrediamur ita ostendit: quoniam cōtingit ut in Naturali disciplina non sint eadem nota nobis & natura quemadmodum in Mathematicis in quibus sunt eadem nota nobis & simpliciter in quibus itaque non sunt eadem nota nobis & natura opus est



vt hoc modo progrediamur, uidelicet ab ijs, quæ sunt nobis notiora ad natura notiora & manifestiora vt ita dixerim.

Quod quidem est verissimum quoniam nulla cognitio ab illis, quæ ignota sunt initium sumere debet cum ignota nullâ scientiam suppeditare ualeant: recteq. Arist. indefinitè rationē hanc protulit, quoniam ex Logicis patet duas subcontrarias simul esse veras, ut si quispiam dixerit. Aliqua sunt nota nobis & natura quemadmodum in Mathematicis. Quædam nō sunt nota nobis & natura, vt in Naturali philosophia & Metaphysica. Methodum hanc aptissime nobis innatam esse dixit tū quia prima nobis data est, tū quia per disciplinas accedere minime videatur: cognitio enim, quæ à sensibus pendet illā, quæ intellectus esse fertur antecedit: propterea, quod nihil sit in intellectu, quod prius non fuerit in sensu. Vnde cognitio, quæ à sensu ad intellectum tendit, potius cognitio, quam scientia dici debet, quæ cum sit per causam propter quam res est notiora natura secum habet: itaque notiora, quæ hoc loco sumenda esse tradit Arist. non dicuntur principia rei demonstrandæ sed potius quædam, quæ illam consequuntur: atque hoc cognoscendi modo, qui præceptorius est non autem demonstratiuus in illis utimur in quorū scientia non est facultas vtendi veriore demonstratione ac potiore, quod sanè fit, quia sæpenumero rerum natura hoc modo se habet cum principaliora non admittit, vel si ea habeat sunt tamē nobis occultiora: & minus manifesta. vt cum Lunam ex diuersis illuminationibus sphericam esse probamus, non autem quia sit quintæ essentiæ quoniā non potest aliquod corpus orbiculare esse quin fuerit sempiternū nobis autem est occultū corpora cœlestia sempiterna esse: quare cogimur per ea, quæ nobis apertiora sunt figuram illorum sphericam esse monstrare. Quod quidem in supremis generibus fieri videmus quorum descriptiones non autem definitiones afferri solent. Quod etiam in septimo Metaphy. scriptum reliquit: operepretium enim esse ad ea, quæ sunt simpliciter notiora ab illis progredi, quæ nobis sunt notiora. Discunt enim



omnes hoc modo ex minus notis natura ad magis nota proficiscētes, ita vt nulli dubium sit quemadmodum in ceteris contingit disciplinis à notioribus in Naturali scientia eundum esse ad ea, quæ ignota sunt atque cum non eadem sint in illa nota nobis & natura quemadmodum in Mathematicis à notioribus nobis ad notiora natura progredi oportere, quod etsi de aliis dici possit in quibus diuersa habentur hæc notiora primū tamen de Naturali disciplina quemadmodum Auer. sentit dictum est cuius proœmium hoc est.

Quibus ita explanatis patet quantum illi peccauerint, qui non Methodum hanc Naturali philosophiæ adeo vtilem sed ordinem potius Arist. scripsisse affirmauerunt, ac si hoc pacto ratiocinetur innata est nobis via vt à notioribus exordiamur sed confusa, quæ sunt magis vniuersalia sunt notiora, igitur à magis vniuersalibus ad minus vniuersalia ire necessarium est. Arist. enim qui nihil, quod necessarium sit omittere solet, atque breuitati studet, vitio vertendum esset, quod eam propositionem indefinitam & conclusionem frustra interposuisset quare cum duæ sint conclusiones, quæ ab eadem propositione ortum ducere possunt certum est. Duos in hac præfatione processus haberi, quorum alter, qui demonstratione vtitur Methodum constituit: alter vero, qui demonstratione non indiget ipsum doctrinæ ordinem, quemadmodum latius in quarta particula ostendemus.

### Particula III.

*Sunt autem primum nobis dilucida ac manifesta confusa magis; posterius autem ex his nota fiunt elementa & principia ijs, qui diuidunt hæc.*

Methodo proposita, cuius futurus est vsus ad principia rerum naturalium & ceterarum rerum, quæ difficillimè sunt cognitionem, quàm ab ijs, quæ notiora sunt nobis, natura ve-



ro ignotiora initium fumere dixit: propositum Arist. in hac particula est, primū quæ nam sint illa notiora nobis, à quibus via hæc innata exorditur exponere, deinde vero ad quæ nam ex illis progrediatur: atque illa primum in Methodo occurrere statuit, quæ composita sunt siue confusa, postea vero ipsorum compositorum partes, ex quibus tanquàm ex suis principijs constare videntur. Quare non recte illi faciunt, qui tantū hoc loco Arist. quæ nam sint notiora nobis indicare putauerunt, quia constat viam hanc processum quemdam esse, qui & notiora nobis & notiora natura assumit, etsi primum illi notiora nobis offerantur, à quibus vt notiora natura consequamur, occasionem habet, qui illa vtitur in disciplinis. Etenim cum in altera demonstrationis specie constituta sit, intellectiuam cognitionem etiam postulat propterea, quòd demonstratio opus sit ipsius intellectus, quare Methodus cum à compositis ad eorum partes incedat, & sensu & intellectu vtitur: à sensu enim, qui quodammodo principium scientiæ est, occasionem sumit, ut auxilio intellectus vnumquodq; distinctæ cognoscere valeat, quemadmodum experimur in cognitione domus euenire, sensui enim sola domus primum offerri solet, ratio autem ipsa Domum in suas partes dissoluens, illius principia quærit & intelligit, atque illis intellectis distinctam illius cognitionem consequitur, quæ ab ipsa definitione oritur, domum scilicet operimentum esse ex lapidibus cementis & lignis factum à domificatore, propter iniurias cœli prohibendas. Huiusmodi autem cognitionem cum doctissimi quidam Latinorum suspicarentur, cognitionem generis appellauerunt, quoniam & sensitiuam & intellectiuam complectitur. de qua quidem commodius agemus, cum difficultates illas tractabimus, quæ locus hic peperit, satis obscurus, quoniam confusum siue id quod totum esse videtur, non solum in ipsa cognitione generis, verumetiam & in alijs locum primum habere videatur, si nostrum cognoscendi modum inspexerimus. Quare mirum non est, cum plurimi non composita, quod hic legendum iudicamus,



dicamus, sed confusa potius dixerint, si vnicum tantum processum in hac præfatione haberi uoluerint, qui quidem est ab uniuerfalibus ad singularia incedens. Quoniam confusa hæc ipsa uniuerfalia esse putauerunt, quod ita se habere posterius ostendemus, cum duos processus sibi repugnantes interponat Arist. quorum prior demonstratione utitur, alter autem Naturam ipsam generantem imitatur. Quos quidem notiora diuersa sumere oportet, alterum ipsa composita, cum sint confusa, alterum vero ipsa magis communia, quæ si minus communibus conferantur etiam confusa dicuntur. cum totius utrumque rationem habeat. Quod Theoph. Arist. discipulus cognouit, quādo ait: Cum res oēs naturales absq; motu cognosci nequeāt, de naturalibus dicentes, sensum prætermittere non possumus, sed ab eo incipientes tentandum erit, naturalia contēplari, & eorū principia, quare cū processus hic demonstratione quia utatur, per cōfusa ipsa cōposita quæ sensibus subiiciūtur, intelligere oportet, nō autē magis uniuerfalia, siue particularia, qm uniuerfalia tantum ab ipso intellectu cognoscuntur, atque illorum notitia innata non est, nisi Platonium dogma sequi uoluerimus, eorumque principia & causæ cum prima sint & simplicissima, non reperiuntur, in quæ dissolui possint, nisi valde æquiuoce, ut si species principia generum dicamus, quia partes illius esse uideantur: atque si hoc pacto uniuerfalis principia dicere uoluerimus, ei solum cōuenire videbitur, quod uniuerfale post multa nuncupatur, de quo nullū potest in hoc loco sermonē facere Arist. cōstitutum itaq; sit, ipsa cōposita in via doctrine notiora esse, quæadmodum sunt causæ & principia in ordine doctrine, qui naturam imitatur, propterea quod quemadmodum recte Auer. notauit, Natura si cognosceret, veluti in generatione rerū incipit à causis, ita etiam illas primum cognosceret, quemadmodum Artifices, qui in artefactis à causis Artefactorum incipere solent. nec inculpandus à Recentioribus tam leuiter venit Auer. qui hypotheticè loquutus est, cum sit manifestum natu-



ram sine cognitione agere, nisi Deum aut intelligentiam Naturam statuamus, quemadmodum Arist. in primo celi scriptum reliquit: Recte videtur Natura futurum ingenitum & incorruptibile, exemisse à contrarijs. Quare Naturam hanc potuit intelligere Auer. ut nihil tam temere illi imponi debeat. In omni itaque cognitione ex ijs, quæ determinauimus cum ipsum confusum sit nobis primo notum, vanum & inutile est amplū & magnificum de primo cognito quæsitum interponere, in quo illi laborant qui Arist. non intelligunt: etenim cum methodus sensum & intellectum requirat, ordo autem ipsum intellectum tantum, composita autem & vniuersalia cōfusa sint, cui dubium in vtroque processu id quod confusum est siue totum primo notum esse.

### Particula IIII.

*Quapropter ex vniuersalibus ad singularia procedere oportet; totum enim secundum sensum notius est, vniuersale autem totum quoddam est, multa enim comprehendit ut partes, vniuersale.*

Occasione eorum quæ Arist. determinauit, non esse eadem nota nobis & natura, & propterea necessarium fore, vt à notioribus nobis ad notiora natura incedamus, illis inuentis adhuc non patet, cum hæc simpliciter nota sint magis communia & minus communia, à quibus in tractatione rerum naturalium auspicari oporteat, quare in hac particula cogitur Arist. ostendere, etiam ab illis, quæ natura magis sunt nota, incipiendum esse, quæ cum sint vniuersalia, si singularibus comparentur, igitur in ordine doctrinæ, qui in illis positus est, cum prius & posterius admittant, ab ipsis vniuersalibus est incipiendum, & postea ad singularia progrediendum, quoniam ordo doctrinæ cum sit processus quidam, qui naturam imitatur, aliud in eo moliri



moliri non decet, quàm natura ipsa facit in rerum compositione & generatione. Vnde veluti per corollarium, colligit in ordine doctrinae, qui compositius est, hoc modo incedendum esse, cuius rei eam subiungit rationem, quoniam vniuersalia si conferantur singularibus, cum habeant rationem totius, quemadmodum composita quia multa continent ueluti partes, ab illis in ordine doctrinae, qui etiam à confusis initium sumere debet, exordiri oportet. Intellectu enim tantum cum utatur artifex in ordine, ea quæ apud intellectum notiora sunt, anteponi semper debent, ut à magis manifestis auspicietur.

Prudentissimi itaque Artificis munus exercet Arist. quem in Naturæ rebus declarandis, nihil facere licet, quod naturam ipsam æmulari non videatur: Natura vero cum semper à simplicissimis & primis rerum generationes suscipiat, Naturalis philosophus ab illis rerum naturalium scientiam sumere debet. Quod clarius scriptum nobis reliquit Arist. in principio lib. de partibus animalium cum inquit, in omni contemplandi genere primum communia docenda sunt, deinde illa, quæ vniuscuiusque propria esse censentur, ut a notioribus auspiciemur & demonstrationis fundamenta habeamus nec non ut inutilem rerum repetitionem euitare possimus. In ordine itaque doctrinae, qui compositius est atque intellectiuam cognitionem sibi vendicauit, quæ vniuersalium tantum esse fertur, à magis vniuersalibus ad minus vniuersalia incedere operæpretium extat. Magis autem vniuersalia cum trium sint generum, ante multa, in multis, & post multa, dubium adhuc est quibus primum ordo hic utatur. atque magis dubium est an hæc vniuersalia sint ipsa Theoremata & propositiones indemonstrabiles, an vero principia ipsarum rerum prima & simplicissima, quæ in scientia pertractari debent.

Simplicius putauit vniuersalia, quæ sunt in multis, intelligi, quoniã vniuersalia post multa intelliguntur intellectis singularibus, quæ ad Dialecticum potius spectare videntur. Vniuersalia vero ante multa si dantur, ad Metaphy. spectare uidentur



tur, quare vniuersalia in multis sunt ea notiora in cognitione intellectiua, à quibus ordo doctrinae initium facere debet, cuius generis sunt materia prima forma & priuatio. nec non Natura siue motus, quæ in omnibus rebus naturalibus spectantur.

Ioannes autem Gram. cū per vniuersalia interpretatus fuerit particulare, siue singulare indefinitum, quem Latini. quidam sequuti sunt, voluit vniuersale in multis minime intelligi debere, primum quidem propterea quod exempla, quæ Arist. adfert in sequentibus illi nullo pacto competere possunt, deinde vero quoniam vniuersale in multis nihil aliud sit, quàm congregatio particularium, videlicet prædicatum quod communiter de omnibus prædicatur, quare inquit Ioan. Gram. ipsum singulare indefinitum, quod proxime est sub specie ordinatum, de quo nescimus cui singularium competat, quæ sub specie continentur, intelligi, ut cum uidemus à lōge aliquem hominē primū dicimus esse corpus, deinde animal, donec ita prope fiat, vt hominem dicamus, & postea Ioannem aut Petrū, quæ singularia definita sunt qm̄ nulli alij competere possunt.

Hæc Ioannis Gram. sententia meo iudicio ijs, quæ pro ueritate diximus, conuenire non potest, quoniam non de ea cognitione loquitur Arist. quæ sensuum tantum est, sed de illa, quæ a sensu ad intellectum procedit, in qua ab ipso singulari definito ad illius partes & principia incedimus, progredi autem a singulari uago ad definitū nihil aliud denotare potest, quàm ab eo quod magis confusum est ad minus confusum descendere. per sensum, quoniam primum a remotis uideo esse quendam hominem, deinde autem hunc & illum.

Præterea decipitur Ioan. Gram. cum exempla, quæ posterius adfert Arist. vniuersali in multis competere nolit cum exemplum de toto illi & de pueris conueniat, propterea, quod & ipsum sit confusum & singularia in quibus est comprehendat, tota enim similitudo vniuersalis & totius in ipsa confusione & continentia spectatur, propter quam hæc omnia



omnia in nostra cognitione primum cognoscuntur.

Amplius videtur ipsum particulare si indiuiduo cōferatur, tum nobis tum natura primum occurrere, quoniam Natura primum generat aliquem hominem, deinde Socratem, aut Platonem. Nos etiam antequam natis nomina imponamus hominem dicimus, hunc autem & illum cū Caliam esse statuimus.

Alterum etiam Ioannis fundamentum dubium est, quoniā nondum patet, an vniuersale in causando an vero in prædicando intelligat Arist. de quo non modicam Latini controuersia habent. Ego vero qui vniuersalia in causando Arist. intelligere sentio, propterea quod in ordine demonstratiue nō procedat sed determinatiue: & quia vniuersalia in prædicando ad Logicam spectant, non autem ad naturalem Artificem, deceptus fuit Ioan. cum crediderit, vniuersale in multis esse prædicatū quoddam, cum tale potius sit vniuersale post multa. Materia enim cum forma & priuatione non prædicantur de rebus, quæ ex illis fiunt, sed tantum ab illis esse habent media mutatione, & propterea est necessarium in cognitione rerum, quæ ab illis ortum habent, artificem exordiri.

Itaque per vniuersalia recte Simplicius vniuersale in multis exponere videtur, quoniam cum multa contineat, rationē totius habet, quod confusum est. Materia enim & forma nec non priuatio in omni mutatione reperiuntur, atque nullum est naturale corpus, quod materiam & formam non habeat, ita vt in omnibus diffusa sint hæc duo principia, cum illorum sint causæ per singularia autem etsi videatur ea significare, quæ à principijs ortum habent, quæ sunt corpora omnia tum simplicia tum composita, quoniam ordo doctrinæ ut à principijs ad ea, quæ ab illis ortum habent, progrediamur, postulare uidetur: in scientia tamen, quæ de illis agit, cum singularia non admittantur, ipsa minus vniuersalia nobis per singularia Arist. significauit, ordo.n.cum intellectu solo vtatur, in vniuersalibus manet. Quare magis communia cum sint cōfusa, si minus communibus comparentur, primum à nobis co-



gnosci debent. Quod indicare nobis Arist. in libris de anima videtur, cū primum ea, quæ omni animæ communia sunt, tractet, deinde vero ea, quæ ad vnamquamque animæ facultatē pertinere dicuntur, quod post communem tractationem facere cogitur, propterea quod tractatio, quæ in cōibis versatur, confusam notitiam tribuit, particularis autem distinctam.

Adhuc tamen difficultatem nobis facit Alexander & qui eū sequuntur, cum existimauerint, non vniuersalia in multis quæ rerum sunt principia, sed vniuersales & primas propositiones intelligere Arist. à quibus doctrinam de rebus naturalibus auspicatur, qualis ea esse fertur: quòd sit Necessè aut vnū esse principium aut plura. Quæ Alexandri opinio vt mea fert sententia dictis philosophi minime conuenit, etsi locum aliquem habere videatur, quoniam Artis & rerū principia in scientijs non separantur, quæ demonstratione uti debēt. Etenim ea notiora in ordine proponit Arist. veluti in Methodo, quæ cōfusa sunt, Axiomata per cōtradictionem prolata, cū sint maximæ veritatis, non sunt confusa sed maxime distincta. Præterea quod Alexandrum valde redarguit, est qm̄ certū est Arist. Methodū proposuisse propter illa, quæ difficillima sunt in sciētia naturali, cuius generis sunt principia rerū naturalium prima & simplicissima, quæ à nobis maxime distāt, propositiones autē illæ primæ cum sint notissimæ, methodum hanc minime requirunt.

Amplius Arist. destruit, qui in cōclusionē primæ particulæ materiam librorum de Physica Auscul. statuit esse rerum principia, non autem ipsa Theoremata siue dignitates à quibus demonstrationes exordimur.

Itaq; melius est vt Simpliciū & alios sequamur, qui per vniuersalia prima & simplicissima principia, quæ in rebus naturalibus inueniri possunt intelligunt, quoniam ab illis scientia naturalis auspicatur, vt ea quæ ex illis ortum habent postea docere valeat. quoniam ordo qui naturam imitatur ita requirit. Nos autem qui hæc scientificè tractare debemus cogimur demonstratione uti, & immediatas assumere propositiones quæ



res Alexandrum & multos adhuc decipit.

His itaq; hūc in modum discussis nullū locum habet quæsitū de regressu, qm̄ etsi duo sint processus ab Arist. propositi, alter tantū demonstratione vtitur, alter vero nequaquā. Regressus autem duorum est processuum quorū vterq; sit demonstratio.

Nulla præterea est contradictio in qua oēs adhuc laborant, libri post & huius loci, cū illhic dicat propinquiora sensui nobis notiora, hic autē vniuersalia, quæ à sensibus maxime distāt. Potuit vtrumq; dicere Arist. & recte: etenim Logicus cū sit Artifex cōis quemadmodū Metaph. distinctione illa vtitur cōiter atq; illam proponit vt habeat notius, quod demonstrationi accommodatum est. cuius definitionē quærit & ob id nulli notitię definite distinctionē illam accōmodat sed in vniuersum accipit, dari alterum prius & notius nobis alterū simpliciter. In ijs autē libris Arist. cogitur determinatis notitijs ipsum notius accommodare, ita ut in cognitione, quæ sensu et intellectu vtitur, cōposita sint notiora, in ordine qui intellectu solo vtitur sint ipsa vniuersalia, si cōparentur singularibus. Nec est necessarium vt eas solutiones afferamus quas vnusquisq; apud interpretes videre potest, nec vt aliquid noui dicamus & Auer. imponamus præter rationem, quēadmodum faciūt Recentiores.

Difficultatibus autē sublati cōstare satis debet, ab vniuersalibus. i. a magis cōis in scientia Naturali ad minus cōia incedendum fore, ordinē doctrinæ postulare, quod ea ratio indicat, qm̄ in omni cognitione cū à notioribus sit inchoandum, si totum in Methodo quæ à sensu incipit notius est, propterea quod cōfusum est, in ordine etiam ipsum vniuersale quod collatum singularibus totū quoddam est & confusum, notius esse debet: quare & ab illo exordiēdū uenit, ex quo patet adhuc magis quantum peccauerint illi, qui vnicum processum Arist. scripsisse uoluerunt, cum proportionē utatur, quę non nisi duorum esse potest, similitudo enim quædā inter totum & vniuersale cadit, propterea q̄ vtrumq; in comparatione partium siue inferiorum, quæ continere videntur, dicuntur totum quod-



dam esse, etsi alteram ab altero differat, quoniam vniuersale speciebus sub eo contentis nomen impartitur, totum quem suis partibus nequaquam, cum nemo manum recte nomine totius corporis humani appellauerit: crassa enim & rudis cognitio cum nobis maxime sit familiaris, & omnibus accommodata eaq. rationem totius habent semper nobis sunt notiora. Ita ut sit necessarium duos processus dari quorum primum mentionem habuit Plato in Alcibiade quem Arist. discipulus sequutus est.

Particula V.

*Sustinent autem idem quodammodo & nomina ad rationem, totum enim quoddam indistinctè significant ut puta Circulus. Definitio autem ipsius diuidit in singularia. Et pueri primum appellant omnes viros patres & fœminas matres. Posterius autem determinant horum vnumquodque.*

Videtur in hac particula exemplis quibusdam allatis Arist. ostendere, illud quod totum est & rationem confusi habet, nobis semper primo notum esse, eo quod distinctum esse dicitur, ita ut duo exempla proposita duobus processibus commodè aptari valeant, quemadmodum Simpl. quem Auer. sequitur putauit, ac si primum exemplum de nomine & definitione rerum ipsi methodo magis accommodatum sit, exemplum autem à pueris acceptum ipsi ordini doctrinæ conuenire possit, itaque cum uideamus, in cognitione rerum primum illam contingere, quæ est ipsius nominis, deinde autem illam quæ per definitionem accedit, Nomen vero confusam solum rerum notitiam suppeditet, quoniam totum quoddam & indistinctè significat, nulli dubium est id quod confusum est, primo nobis notum esse, quemadmodum de circulo, primum circulum esse, quod etiam indoctis accidit, intelligimus, deinde autem à Mathematicis edocti, quod sit figura plana una linea contenta, in qua omnes lineæ ductæ à centro ad circumferentiam sunt æquales, quæ sane ratio partes ipsius circuli



circuli nobis declarat, ita vt distinctam nobis tribuat circuli cognitionem, nomen autem cum in singularia non diuidat confusam & crassam notitiam ipsius circuli tantum concedit: vnde etiã ipsum quid nominis ipsum quid rei in doctrinis antecedit, propterea quòd confusam notitiam parit, non autem distinctam. Quare per nomen hoc loco cum quibusdam Latinis ipsum quid nominis minime intelligi debet, sed nomen ipsum, quod magis confusam ipso quid nominis scientiã præbet. Pueri præterea qui ratione uti nesciunt, primum confusam cognitionem habent, cum omnes viros patres, omnes vero foeminas matres appellent, deinde autem distinctam assequuntur, cum proprios parentes ab aliis distinguere norunt.

Itaque cum videamus confusam cognitionem eam antecedere, quæ distincta est, nulli dubium esse potest, ipsum totum quod confusi rationem habet, semper notius esse. Quare tum in Methodo tum in ordine doctrinæ ab ijs, quæ confusa sunt, Naturalem Artificem exordiri operæpretium extat, cum autem non sit omnimoda similitudo inter nomen & totum, recte adiunxit eam particulam quodammodo, Arist. quoniam non quemadmodum totum ipsum in partes diuiditur, ita & ipsum nomen est ab ipsa definitione diuisum, sed nominis significatum definitio diuidit, neque quo pacto singulare est vniuersalis pars, definitionis partes sunt nominis partes. Et propterea uidetur primum exemplum magis methodo accommodatum esse: secundum autem ipsi ordini, propterea quod vniuersum de suis partibus separatim dicitur, ut animal de homine & equo, Nomen autem de toto quidem eo, quod definitione exprimitur, at non de partibus illius. Quibus ita explanatis, nihil quod ad hanc Præfationem attinere possit, à nobis relictum fuisse uideo, in qua tria nobis Arist. tradidit, primum quidem librorum de Physica auscultatione materiam, deinde autem Methodum, cuius erit vsus in rerum naturalium cognitione, quam demonstrationem à posteriori esse voluit, cui ordinem adiunxit, quem res naturales, quæ tractari debent, requirunt,



quirunt, qui quidem compositius est, à simplicioribus ad ea, quæ composita sunt incedens, quod quidem etiam in particularium rerum tractatione obseruare videtur. veluti in lib. de Animalibus & de anima. in quibus ne quidem unguem ab eo ordine discedit.

Quæ profectò cogitur Aristo. docere atq; omittere subiectū genus totius philosophiæ naturalis in prima particula propterea quod à Metaphy. substantiā sensibilem cui motū adiungit accipere debet Methodum autem præscribit, quoniam sine illa quæ intellectus sunt commode sciri nō possunt nec inueniri, quæ quidem inuenta cum fuerint cum ordinem requirant postremo loco ordinem adiungere oportet quem compositium esse voluit, quoniā hic ordo ad res pertractandas & ad eas quas inuenimus commodissimus extat, ex sententia Gal. in principio Artis medicinalis.

# FINIS.

Errata, quæ operarum præpropera festinatione irreperunt, ita corrigito.

Pag.	versu	Errata	correcta
9	8	mereantur	mereatur
	24	primam	primum
11	26	ha	hac
12	34	cum per	si per
13	3	perpetuum	perpetuam
31	3	tantum	etiam
	7	dicitur	dixit
32	11	vt hic	vt hæc
36	2	principium	principijs
52	2	totum quem	totum autem
	6	caq.	ea quæ